

四庫全書

集部

欽定四庫全書

集部

宋文紀卷五

詳校官庶吉士_臣瑚圖禮

主事銜_臣徐以坤覆勘

總校官進士_臣楊懋珩

校對官中書_臣李斯咏

謄錄監生_臣馮國炳

欽定四庫全書

宋文紀卷五

明 梅鼎祚 編

孝懿蕭皇后

諱文壽蘭陵人孝皇繼室累遵為太皇太后

遺令

高祖母孝穆趙皇后以產疾殂事繼母蕭太后甚謹少帝即位加崇太皇太后景平

元年殂初高祖貧微孝皇葬禮多闕遺命太后不必祔葬故至是託后遺令

孝皇背世五十餘年古不祔葬且漢世帝后陵皆異處
今可於塋域之內別為一壙孝皇陵墳本用素門之禮
與王者制度奢儉不同婦人禮有所從可一遵往式

皇太后張氏

不知何郡縣人義熙初得幸武帝生少帝初封夫人尊為皇太后

廢少帝立宜都王令

少帝即位二年多過失司空徐羨之等謀廢立稱太

后令少帝廢拜營陽王太妃

王室不造天禍未悔先帝創業弗永棄世登遐義符長嗣屬當天位不謂窮凶極悖一至於此大行在殯宇內哀惶幸災肆于悖詞喜容表于在感至乃徵召樂府鳩集伶官優倡管絃靡不備奏珍羞甘饍有加平日採擇媵御產子就宮覲然無忤醜聲四達及懿后崩背重加

天罰親與左右執紼歌呼推排梓宮拊掌笑謔殿省備
聞加復日夜嫖狎羣小慢戲興造千計費用萬端帑藏
空虛人力殫盡刑罰苛虐幽囚日增居帝王之位好皂
隸之役處萬乘之尊悅廝養之事親執鞭撻毆擊無辜
以為笑樂穿池築觀朝成暮毀徵發工匠疲極兆民遠
近歎嗟人神怨怒社稷將墜豈可復嗣守洪業君臨萬
邦令廢為營陽王一依漢昌邑晉海西故事奉迎鎮西
將軍宜都王義隆入纂皇統

太皇太后路氏

諱惠男丹陽建康人爲文帝淑媛生孝武帝前廢帝即位尊爲太皇

太后

立湘東王彧令

前廢帝凶悖明帝時爲湘東王謀廢帝使壽寂之等殞帝華林

園稱太皇太后令奉湘東即位

司徒領護軍八座子業雖曰嫡長少稟凶毒不仁不孝
著自髫髻孝武棄世屬當辰歷自梓宮在殯喜容醜然
天罰重罹歡恣滋甚逼以內外維持忍虐未露而凶慘
難抑一旦肆禍遂縱戮上宰殄害輔臣子鸞兄弟先帝

鍾愛含怨既往枉加屠酷昶茂親作扞橫相徵討新蔡
公主逼離夫族幽置深宮詭云薨殞襄事甫爾喪禮頓
釋昏酣長夜庶事傾遺朝賢舊勳棄若遺土管絃不輟
珍羞備膳詈辱祖考以為戲謔行游莫止淫縱無度肆
宴園陵規圖發掘誅剪無辜籍略婦女建樹僞豎莫知
誰息拜嬪立后慶過恒典宗室密戚遇若婢僕鞭撻陵
曳無復尊卑南平一門特鍾其酷反天滅理顯暴萬端
苛罰酷令終無紀極夏桀殷辛未足以譬闔朝業業人

不自保百姓遑遑手足靡厝行穢禽獸罪盈三千高祖
之業將泯七廟之享幾絕吾老疾沉篤每規禍鵠憂煎
漏刻氣命無幾開闢以降所未嘗聞遠近思奮十室而
九衛將軍湘東王體自太祖天縱英聖文皇鍾愛寵冠
列藩吾早識神睿特兼常禮潛運宏規義士投袂獨夫
既殞懸首白旗社稷再興宗祀永固人鬼屬心大命允
集且勲德高邈大業攸歸宜遵漢晉纂承皇極主者詳
舊典以時奉行未亡人餘年不幸嬰此百艱永尋情事

雖存若殞當復柰何當復柰何

賜豫章王子尚山陰公主楚玉死令

太宗殞廢帝稱太后

令子尚楚玉並孝武帝王皇后生

子尚頑凶極悖行乖天理楚玉姪亂縱慝義絕人經並

可于第賜盡

皇太后王氏

諱貞風琅邪臨沂人為明帝后後廢帝即位尊為皇太后齊建元元年薨

廢立令

明帝子昱立為後廢帝狂慝失德蕭道成弑之稱太后令迎立安成王是為順

帝禪位道成

衛將軍領軍中書監八座昱以冢嫡嗣登皇統庶其體
識日弘社稷有寄豈意窮凶極悖自幼而長善無細而
不違惡有大而必蹈前後引誘常加隱蔽險戾難移日
月滋甚棄冠毀冕長襲戎衣犬馬是狎鷹隼是愛皐樞
軒殿之中鞬縶宸宸之側至乃單騎遠郊獨宿深野手
揮矛鋌躬行刳斮白刃為弄器斬害為恒務捨交戟之
衛委天畢之儀趨步闕闕酣歌鑪肆宵遊忘返宴寢營
舍奪人子女掠人財物方策所不書振古所未聞沈勃

儒士孫超功臣幼文兄弟並豫勲効四人無罪一朝同
戮飛鏃鼓劒孩稚無遺屠裂肝腸以為戲詭投骸江流
以為懽笑又淫費無度帑藏空竭橫賦闕河專充別蓄
黔庶嗷嗷厝生無所吾與其所生每厲以義方遂謀酖
毒將騁凶忿沈憂假日慮不終朝自昔辛癸爰及幽厲
方之於此未譬萬分民怨既深神怒已積七廟玷危四
海褫氣廢昏立明前代令範况乃滅義反道天人所棄
豐深牧野理絕桐宮故密令蕭領軍潛運明略幽顯協

規普天同泰驃騎大將軍安成王體自太宗天挺淹裔
風神凝遠德映在田地隆親茂皇歷攸歸億兆係心含
生屬望宜光奉祖宗臨享萬國便依舊典以時奉行未
亡人追往傷懷永言感絕

追封後廢帝令

昱窮凶極暴自取灰滅雖曰罪招能無傷悼棄同品庶
顧所不忍可特追封蒼梧郡王

謝昭容

請東平王子嗣還本屬表

子嗣孝武帝第二十
七子繼東平冲王休

倩休倩母嚴酷子嗣所生母景
寧園昭容謝上表太宗許之

故東平冲王休倩託茲璿極岐嶷夙表降年弗永遺胤
莫傳孝武皇帝敕妾子臣子嗣出繼為後既承國祀方
奉烝薦庶覃遐慶式延于遠而妾顏訓養非恩撫導乖
理情闕引進義違負螟昔世祖平日詭申慈愛崩背未
幾真性便發猶逼畏崇憲少欲藏奄自茲以後專縱嚴
酷寔顯布宗戚宣灼宮闈用傷人倫爰惻行路妾天屬

冥至感切實深伏願乾渥廣臨曲垂照賜復改命還依
本屬則妾母子雖隕之辰猶生之願

有司奏上蕭太后尊號

高祖繼母為宋王加太妃之號及踐阼有司奏

尊為皇太后
並有司后號奏附以下

臣聞道積者慶流德洽者禮備故祇敬表於崇高嘉號彰於盛典伏惟太妃母儀之德化穆不言保翼之訓光被洪業雖幽明同慶而稱謂未窮稽之前代禮有恒準宜式遵舊章允副羣望

有司上張太后尊號奏

少帝母有司奏為皇太后及少帝廢為營陽王

拜太妃

臣聞嚴親敬始所因者本充孝之道由中被外伏惟夫人德並坤元徽音光劭發祥兆慶誕啓聖明宜崇極徽號允備盛則從春秋母以子貴之義遵漢晉推慶之典謹上尊號為皇太后宮曰永樂

有司追尊胡太后奏

后諱道女淮南人高祖納之生文帝後被譴死宋初

贈婕妤太祖即位有司奏尊為章皇太后

臣聞德厚者禮尊慶深者位極故闕宮既構咏歌先妣
園陵崇衛聿追來孝伏惟先妣好柔明塞淵光被六列
德昭以範訓洽母儀用能啓祚聖明奄宅四海嚴親莫
逮天祿永違臣等遠準春秋近稽漢晉謹上尊號曰章
皇太后陵曰熙寧

有司奉尊路太后奏

文帝路淑媛生孝武帝及
入討元凶即位有司奏尊

為皇
太后

臣聞厯集周邦徽音充嗣氣淳漢國沙麓發祥昔在上

代業隆祚遠未有不敷陰教以闡洪基膺淑慶以載聖哲者也伏惟淑媛柔明內昭徽儀外範合靈初迪則庶姬仰耀引訓蕃閭則家邦被德民應惟和神屬惟祉故能誕鍾獻躬用集大命固靈根于既殞融盛烈乎中興載厚化深聲詠允緝宜式諧舊典恭享極號奉尊號曰皇太后宮曰崇憲

有司追尊沈太后奏

文帝沈婕妤好生明帝元嘉三十年卒贈湘東國太妃

明帝即位有司奏追尊為皇太后諡曰宣

昔幽都追遠正己纏哀緬慕德義敬奉園陵先太妃德履端華徽景明峻風光宸掖訓流國闡鞠聖誕靈蚤捐鴻祚臣等遠模漢冊近儀晉典謹上尊號為皇太后

有司尊陳太妃奏

妃諱妙登丹陽建康人明帝納之生後廢帝拜貴妃及後

廢帝踐阼有司奏尊為皇太妃因改諸王國太妃曰大妃妃音怡

臣聞河龍啓聖理浹民神郊電基皇慶爍天地故資敬之道粹古銘風沿貴之誼眇代凝則伏惟貴妃含和日晷表淑星樞徽音峻古柔光照世聲華帝掖軌秀天嬪

景發皇明祚昌睿命而脩物之章未換彛策遠酌前王
允陟鴻典臣等參議謹上尊號曰皇太妃

長沙王義欣

父道憐高祖中弟嗣位歷豫州刺史進號鎮軍將軍薨于任

陳長吏奏

義興為豫州刺史隨宜經理遂稱彊鎮時淮西北長吏悉叙勞人武夫

多無政術
義欣陳之

江淮左右土壻民疎頃年以來荐饑相襲百城彫弊於
今為甚綏牧之宜必俟良吏勞人武士不經政術統內
官長多非才授東南殷實猶或簡能况賓接荒垂而可

輯繁頓闕願敕選部必使任得其人庶得不勞而治

舉郡守申季歷表

元嘉九年義欣為豫州刺史上言進號寧朔將軍

所統威遠將軍北譙梁二郡太守關中侯申季歷自奉職邦畿于茲五年信惠並宣威化兼著外清姦暴內輯民黎役賦均平閭井齊肅綏穆初附招携荒遠郊境之外仰澤懷風爵賞之授績能自顯宣升階秩以崇獎勵

告司兗二州

太祖踐阼有志北略元嘉七年三月詔遣右將軍劉彥之等分兵進

取河南後將軍長沙王義欣出鎮彭城總統羣帥告司兗二州魏主燾悉歛河南一城歸

河北魏大衆南渡河洛陽
滑臺虎牢諸城並為魏沒

夫王者之兵以義德相濟非徒疆理土地恢廣經略將
以大庇蒼生保全黎庶是以蒙踐霜雪踰歷險難匡國
寧民肅清四表昔我高祖武皇帝誕膺明命爰造區夏
內夷篡逆外寧寇亂靈武紛紜雷動風舉響軼龍堆聲
浮雲朔陵天振地拔山蕩海於是華域肅清謳歌允集
王綱帝典煥哉惟文太和網緼流澤洋溢中葉諒闇委
政冢宰魏人乘釁侵侮上國遂令司充良民復蹈非所

周鄭遺黎重隔王化聖皇踐祚重光開朗明哲柔遠以
隆中興遐夷慕義雲騰波湧方將蹈德履信被藝襲文
增修業統作規於後勤施洽於三方惠和雍於北狄夫
養魚者除其獮獺育禽者去其豺狼故智士研其慮勇
夫厲其節嘉謀動蒼天精氣貫辰緯莫府忝任稟承廟
筭翦爪明衣誓不顧命提吳楚之勁卒總八州之銳士
紅旗降天素甲奪日虎步中原龍超河渚興雲散雨慰
大旱之思弔民伐罪積後已之情師以順動何征而不

克況乎遵養耆昧綏復境土而已哉昔淮泗初開狡徒
縱逸王旅入關羣豎飄扇襄邑之戰素旗授首平城之
役伏屍蔽野支解體分羽翼摧挫加以構難西邊結怨
黃龍控弦燔滅首尾逼畏蜂屯蟻聚假息旦夕豈復能
超蹈長河以當堂堂之陳哉夫順從貴速歸德惡晚賞
褒先附威加後服是以秦趙羈旅披榛委誠施紱乘軒
剖符州郡慕容姚泓恃強作禍提挈萬里卒嬰鈇鉞皆
目前之誠驗往世之所知也聖上明發愛恤以道懷二

州士民若能審決安危翻然草面率其支黨歸投軍門者當表言天臺隨才敘用如其迷心不悛竄首巢穴長圍既周臨衝四至雖欲壺漿厥筐其可得乎幸加三思詳擇利害

臨川王義慶

本長沙王道憐第二子繼襲臨川王道規歷都督南兗州刺史開府儀同

三司為宗室之表

祖避孫讎議

義慶元嘉初遷丹陽尹時有民黃初妻趙氏子婦趙遇赦應徙避孫讎

義慶

議

案周禮父母之讎避之海外雖遇市朝鬪不及兵蓋以
莫大之冤理不可奪含戚枕戈義許必報若至於親戚
為戮骨肉相殘故道乖常憲記無定准求之法外裁以
人情且禮有過失之宥律無讎祖之文况趙之縱暴本
由于酒論心即實事盡荒耄豈得以荒耄之王母等行
路之深讎臣謂此孫忍愧銜悲不違子義共天同域無
虧孝道

上舉士表

元嘉十二年普使內外
羣官舉士義慶上表

詔書疇咨羣司延及連牧旌賢仄陋拔善幽遐伏惟陛下惠哲光宣經緯明遠皇階藻曜風猷日昇而猶詢衡室之令典遵明臺之獻訓降流慮於管庫紆聖思乎版築故以道邈往載德高前王臣敢竭虛閣祇承明旨伏見前臨沮令新野庾寔秉真履約愛敬淳深昔在母憂毀瘠過禮今罹父疚泣血有聞行成閨庭孝著隣黨足以敦化率民齊教軌俗前徵奉朝請武陵龔祈恬和平昔貞純潔素潛居研志耽情墳典亦足鎮息頽競獎勗

浮勤處士南郡師覺才學明敏操介清修業均井渫志
固氷霜臣往年辟為州祭酒未汙其慮若朝命遠暨玉
帛遐臻異人間出何遠之有

謝賜如意啓事

恩旨賜臣犀鏤竹節如意目所未睹

北堂書鈔

彭城王義康

小字車子武帝第四子歷位大將軍領司徒以范曄等謀立徙安成郡賜

死

上文帝遜位表

義康為司徒錄尚書事又領揚州刺史專總朝權事決自己太

子詹事劉湛素經情款與其族左長史劉斌等互為傾反初太祖疾嘗危湛意在奉義康

及疾豫亦微聞之而羣小結為朋黨構造愆釁元嘉十七年乃收湛付廷尉伏誅遣人宣

旨于義康因上表遜位改授江州刺史出鎮豫章其後范曄等謀逆坐誅

臣幼荷國靈爵遇踰等陛下推恩睦親以隆棠棣愛忘其鄙寵授遂崇任總內外位兼台輔不能正身率下以肅庶僚暱近失所漸不自覺致令毀譽違實賞罰謬加由臣才弱任重以及傾撓今雖罪人即戮王猷載靜養釁貽垢實由於臣鞠躬慄慄若墮谿壑有何心顏而安

斯寵輒解所職待罪私第

歲饑平糶議

元嘉中三吳水潦穀貴人饑彭城王義康議

東土災荒人凋穀踊富商蓄米日成其價宜班下所在
隱其虛實令積蓄之家聽留一年儲餘皆敕使糶貸為
制平價此所謂常道行於百代權宜用於一時也又緣
淮歲豐邑地沃壤麥既已登黍粟行就可折其估賦成
就交市三吳饑人即以貸給使彊壯轉運以贍老弱

通典

江夏王義恭

武帝第五子歷中書監太尉錄尚書事為前廢帝所害

舉才表

義恭元嘉九年徵為南兗州刺史鎮廣陵時詔內外百官舉才義恭舉南陽宗

炳等

臣聞雲和備樂則繁會克諧驛騶服則致遠斯效陛下順簡彘化文明在躬玉衡既正泰階載一而猶發慮英髦人情仄陋幽谷空同顯著揚歷是以潛虬聳鱗佇利見之期翔鳳弭翼應來儀之感竊見南陽宗炳操履閒遠思業貞純砥節丘園息賓盛世貧約而苦內無改情軒冕屢招確爾不拔若以蒲帛之聘感以大倫之美

庶投竿釋褐翻然來儀必能毗燮九官宣贊百揆尚書
金部郎臣徐森之臣府中直兵參軍事臣王天寶並局
力允濟忠諒歎誠往年逆臣叛逸華陽失守森之全境
寧民績章危棘前者經略伊瀍元戎喪旅天寶北勤河
朔東據營丘勲勇既昭心事兼竭雖蒙獎叙未盡才宜
並可授以邊藩展其志力交趾遼邈累喪藩將政刑每
闕撫莅惟艱南中負遠風謠迴隔蠻獠狡竊邊氓茶炭
寔須練實以綏其難謂森之可交州刺史天寶可寧州

刺史庶足威懷荒表肅清遐服昔魏戊之賢功存薦士
趙武之明事彰管庫臣識愧前良理謝先哲率舉所知
仰酬採訪退懼瞽言無足甄獎

上嘉禾頌表

元嘉二十四年七月嘉禾旅生華林園及景陽山園丞梅道念以聞

其中甘露降京師太尉江夏王義恭上表獻頌

臣聞居高聽卑上帝之功天且弗違聖王之德故能影
響二儀甄陶萬有鑒觀今古採驗圖緯未有道缺化虧
而禎物著明者也自皇運受終辰曜交和是以卉木表

靈山淵效寶伏惟陛下體乾統極休符襲逮若乃鳳儀
西郊龍見東邑海酋獻改緇之羽河祗開俟清之源三
代象德不能過也有幽必闡無遠弗屆重譯歲至休瑞
月臻前者躬籍南畝嘉穀乃植神明之應在斯尤盛四
海既穆五民樂業思述汾陽經始靈囿蘭林甫樹嘉露
頻流板築初就祥穰如積太平之符於是乎在臣以寡
立承乏槐鉉沐浴芳津預覩冥慶不勝抃舞之情謹上
嘉禾甘露頌一篇不足稱揚美烈追用悚汗其頌曰二

象攸分三靈樂主齊應合從在今猶古天道誰親唯仁
斯輔皇功帝績理冠區宇四民均極我后體茲惟機惟
神敬昭文思九族既睦萬邦允釐德以位叙道致雍熙
於穆不已顯允東儲生知夙敵嶽茂淵虛因心則哲令
問弘敷繼徽下武儷景辰居軒制合宮漢興未央矧伊
聖朝九有已康率由舊典思燭前王乃造凌霄遂作景
陽有藹景陽天淵之渙清暑爽立雲堂特起植類斯育
動類斯止極望江波遍對岳峙化德惟達休瑞惟懋誕

降嘉種呈祥初構甘露春凝禎穠秋秀于今匪烈嗣歲
仍富昔在放勲歷茲數朝降及重華倚扇清庖鑠矣皇
慶比物競昭倫彼典策被此風謠資臣六蔽任兼兩司
既惡仲哀又慙鄭緇豈忘衡泌樂道明時敢述休祉愧
闕令辭

請徙彭城王義康奏

義康初以罪出鎮豫章元嘉二十四年豫章胡誕等

聚衆據郡復欲奉戴義康錄尚書義恭等奏徙廣州奏可越四年賜死

投畀之言義著雅篇流殛之教事在書典庶人義康負

釁深重罪不容戮聖仁不忍屢加遲回宥其大辟賜遷
近甸斯乃至愛發天超邈終古曾不遇愆甘引而讒言
同衆恨悖僥倖每形辭色內宣家人外動民聽不逞之
族因以生心胡誕世假竊名號構成凶逆杜漸除微古
今所務况禍機驟發庸可忽乎臣等參議宜徙廣州遠
郡放之邊表庶有防絕

勸孝武帝即位表

元凶劬弑立義恭進位太保
疑有異志使住尚書下省世

祖入討前鋒至新亭劬挾義恭出戰使於東
堂簡將因單馬奔世祖於新林浦上表勸進

於新亭
即位

臣聞治亂無兆倚伏相因乾靈降禍二凶極逆深酷巨
痛終古未有陛下忠孝自天赫然電發投袂泣血四海
順軌是以諸侯雲赴數均八百義奮之旅其會如林神
祚明德有所底止而冲居或躍未登天祚非所以嚴重
宗社紹延七百昔張武抗辭代王順請耿純陳歎光武
正位況今罪逆無親惡盈釁滿阻兵安忍戮善崇姦履
地戴天畢命俄頃宜早定尊號以固社稷景平之季實

惟樂推王室之亂天命有在故抱拜兆於壓壁赤龍表
於霄徵伏維大明無私遠存家國七廟之靈近哀黔首
荼炭之切時陟帝祚永慰羣心臣負釁嬰罰偷生人壤
幸及寬政待罪有司敢以漏刻視息披露肝膽

臧質宜藏首武庫奏

孝武帝孝建元年質為江州刺史挾南郡王義宣反

兵敗逃武昌南湖為戍主斬首傳京師錄尚書江夏王臣義恭左僕射臣宏等奏詔可

詳見義宣及質

臧質底棄下才而藉遇深重窮愚悖常構扇凶逆變至

滔天志圖泯夏違恩叛德皐過恒科梟首之憲有國通
典懲戾思永去惡宜深臣等參議須臾日限意使依漢
王莽事例漆其頭首藏于武庫庶為鑑戒昭示將來

上孝武帝請封禪表

大明元年十一月太宰江夏王義恭上表請封禪詔

報有司再
奏不許

惟皇天崇稱大夏始行揖讓迄于有晉雖聿脩前緒而
迹淪言廢茂寄於竹素者焉可單書紹乾維建徽號流
風聲被絲管自無懷以來可傳而不朽者七十有四君

罔仁厚而道滅鮮義澆而德宣鍾律之先曠世綿絕難
得而聞丘索著明者尚有遺炳故易稱先天弗違後天
奉時蓋陶唐姚姒商姬之主莫不由斯道也是以風化
大治光熙於後炎漢二帝亦踵曩則因百姓之心聽輿
人之頌龍駕帝服鏤玉梁甫昌言明稱告成上靈況大
宋表祥唐虞受終素德山龍啓符金玉顯瑞異采騰於
軫墟紫烟藹於邦甸錫冕兆九五之徵文豹赴天厯之
會誠二祖之幽慶聖后之冥休道冠軒堯惠深亭毒而

猶執冲約未言封禪之事四海竊以惡焉臣聞惟皇配
極惟帝祀天故能上稽乾式照臨黔首協和穹昊膺茲
多福高祖武皇帝明並日月光振八樞拯已溺之晉濟
橫流之世撥亂寧民應天受命鴻徽洽于海表威稜震
乎沙外太祖文皇帝體聖履仁述業興禮正樂頌作象
厯明達通于神祇玄澤被乎上下仁孝命世獻武英挺
遭運屯否三才湮滅乃龍飛五洲鳳翔九江身先八百
之期斷出人鬼之表慶烟應高牙之建風耀符發迹之

辰親剪凶逆躬清昏盪天地草始夫婦更造豈與彼承
業繼緒拓復禹跡車一其軌書罔異文者同年而議哉
今龍麟已至鳳凰已儀比李已實靈茅已茂雕氣降霽
于宮榭珍露呈味于禁林嘉禾積穰于殿薨連理合幹
于園籞皆耀質離宮植根蘭囿至夫霜毫玄文素翮頽
羽泉河山嶽之瑞草木金石之祥方畿憬塗之謁抗驛
絕祖之奏彪炳雜沓粵不可勝言太平之應茲焉富矣
宜其從天人之誠遵先王之則備萬乘整法駕脩封泰

山瘞玉岱趾延喬松於東序詔韓岐於西廂麾天閤使
啓闕謁紫宮朝太乙奏鈞天詠雲門贊揚幽奧超聲前
古豈不盛哉伏願時命宗伯具茲典庶

初學記謝莊江夏王義恭表云

江淮鄙上之使結軌于壁門西羈北采之

譚相望于道路案此則表為莊代撰也

孝武帝詔報

太宰表如此昔之盛王永保鴻名常為稱首由斯道矣
朕遭家多難入纂絕孝德薄勲淺鑒昧崩愧頃麟鳳表
禎茅永兼瑞雖符祥顯見惡乎猶深庶仰述矢志拓清

中寓禮祇謁神朕將試哉

有司再奏

臣聞崇號建極必觀俗以樹教正位居體必採世以立
言是以重代列聖咸由厥道玄勲上列融章未分鳴光
委緒歇而罔臧若其顯謚畧騰軌則系綴聲采徵略聞聽
爰泊姬漢風流尚存遺芬餘榮綿映紀緯雖年絕世祀
代草精華可得騰金綵奏玉潤鏤迹以燠今鵠德以麗
遠而四望埋禋歌之禮日觀弛脩封之容豈非神明之

業難崇功基之迹易泯自茲以降訖於季末莫不欲英
弘徽位詳固洪聲豈徒深默修文淵幽馭世而已諒以
滕非虛奏書匪罔埋擊雨怒神淳蔭復樹安得紫壇肅
祇竹宮載竚散火投郊流星奔座寶緯初基厭靈命厯
德振弛維功濟淪象玄浸紛流華掖幽潤規存永馭思
祥樹遠太祖文皇帝以啓邁泰運景望震凝采樂調風
集禮宣度祖宗相映軌迹重暉聖上韞錄蕃河竚翔衡
漢金波掩照華耀停明運動時來躍飛風舉澄氛海岱

開景中區歇神還靈顏天重耀儲正凝位於兼明袞嶽
蕃華於元列故以祥映昌基繫發篆素重以班朝侍典
飾令詳儀纂綜淪蕪搜騰委逸奏玉郊宮裡珪玄時景
集天廟脉壤祥農節至昕陽川丘夙禮網威巡駐表綏
中甸史流其詠民挹其風於是涵迹視陰振聲威響歷
代之渠沈一望內安侯之長賢王入侍殊生詭氣奉俗
還鄉羽族卉儀懷音草狀邊帛絕書權光弛燭天岱發
靈宗河開寶崇丘淪鼎振采泗淵雲皇王嶽摘藻一漢

并角即音栖翔禁籙衮甲霜珠翺舞川肆榮泉流鏡後
昭河源故以波沸外闕雲蒸內澤若其雪趾青氎玄文
朱綵日月郊甸擇木弄音重以榮露騰軒蕭雲掩閣鎬
穎孳萌移華淵禁山與竚衡雲鵲竦翼海鰈泳流江茅
吐蔭校書之列仰筆以飾辭濟代之蕃獻邑以待禮豈
非神勰氣昌物瑞雲照捕軒龜軫闕泉淳芳太宰江夏
王臣義恭咀道遵英栖竒麗古該潤圖史施詳闕載表
以功懋往初德耀炎昊升文中岱登牒天闕耀冠榮名

擣振聲號而道謙稱首禮以虛挹將使玄祗缺觀幽瑞
乖期梁甫無盛德之容介丘靡升聞之響加窮泉之野
獻八代之駟交木之鄉莫絕金之楷肅靈重表珍符兼
貺伏惟陛下謨詳淵載衍屬休章依徵聖靈潤色聲業
諏辰稽古肅齋警列儒僚展采禮官相儀懸蕤動音洪
鐘竦節陽路整衛正途清禁於是績環珮端玉藻鳴鳳
竚律騰駕流文間采比象之容昭明紀數之服徽焯天
陣容藻神行翠蓋懷陰羽華列照乃詔聯事掌祭賓客

贊儀金支宿縣鑄石潤響命五神以相列闕九闕以集
靈警衛兵而開雲先雨祇以灑路霞凝生闕煙起成宮
臺冠丹光壇浮素靄爾乃臨中壇備盛禮天降祥錫壽
固皇根谷動神音山傳稱響然後問年稱老陳詩觀俗
歸薦告神奉遺清廟光美之盛彰乎萬古淵祥之烈溢
乎無窮豈不盛歟臣等生接昌辰肅懋明世東教管聞
未足言道且章志湮微代往淪絕拘採遺文辯明訓誥
希志黃虞邁訪鄒魯草滕書堙玉之禮具竦石繩金之儀

和芝潤瑛鐫璽乾封懼弗軌屬上徽煇當王則謹奉儀
注以聞

詔報

天生神物昔王稱愧況在寡德敢當鴻貺今文軌未一
可停此奏

諫孝武帝親征表

大明三年竟陵王誕有罪貶爵遂據廣陵反上使劉劭等

討之值雨攻城不克上怒使太史擇日將自濟江義恭表諫已而克之誕誅

誕素無才略畜養又寡自拒王命士庶離散城內乏糧

器械不足徒賴免兵蒼頭三四百人造次相附恩怨夙
結臣始短慮謂一句可殄而假息流遷七十餘日上將
受律羣蕃兵峙銳卒精旅動以萬計大威所震未有成
功臣雖凡怯猶懷憤踊陛下入翦封豕出討長蛇兵不
血刃再興七百而蕞爾小醜遂延晷漏致皇赫斯怒將
動乘輿此實臣下素食駑鈍之責行留百司莫不仰慚
俯愧今盛暑被甲日費千金天威一麾孰不幸甚臣伏
尋晉文王征淮南淹師出二百日方能致寇今誕猴糧

垂竭背逆者多慶之等轉悟遲重之非漸見乘機之利
且成旨頻降必應旦夕夷殄愚又以廣陵塗近人信易
達雖為江水約示不難且覩理者寡闇塞者多忽見雲
旗移次京都既當祗悚四方之志必有未達臣愚伏重
思計今寧不當計小醜省生命以安遐邇之情又以長
江險闊風波難期王者尚不乘危況乃汎不測之水昔
魏文濟江遂有遺州之名今雖先天不違動干休慶龍
舟所幸理必利涉然居安慮危不可不懼私誠款款冒

啓赤心追用悚汗不自宣盡

省錄尚書表

世祖以義宣逆亂由於強盛至是欲削弱王侯義恭希旨乃上表又

與竟陵王誕奏定諸王侯儀制詔付有司詳奏詔可

臣聞天地設位三極同序皇王化則九官咸事時亮之績昭於虞典論道之風宣於周載台輔之設坐調陰陽元凱之置起釐百揆所以樂鍼矢言侵官是誠陳平抗辭匪職罔荅漢承秦後庶僚稍改爵因時變任與世移總錄之制本非舊體列代相沿茲仍未革今皇家中造

事遵前文宜憲章先代證文古則停省條錄以依昔典
使物競思存人懷勤壹則名實靡愆庸節必紀臣謬典
國重虛荷崇位興替宜知敢不輸盡

陳蕃戚儀制九事奏

臣聞佾懸有數等級異儀佩笏有制卑高殊序斯蓋上
哲之洪摹範世之明訓而時至彌流物無不弊僭侈由
俗軌度非古晉代東徙舊法淪落侯牧典章稍與事廣
名實一差難以卒變章服崇濫多歷年所今樞機更造

皇風載新耗弊未充百用思約宜備品式之律以定損
厭之條臣等地居枝昵位參台輔遵正之首請以爵先
致貶之端宜從戚始輒因暇日共參愚懷應加省易謹
陳九事雖懼匪衷庶竭微款伏願陛下聽覽之餘薄垂
昭納則上下相安表裏和穆矣

有司附益二十四條奏

車服以庸虞書茂典名器慎假春秋明誠是以尚方所
制漢有嚴律諸侯竊服雖親必罪降于頃世下僭滋極

器服裝飾樂舞音容通於王公達於衆庶上下無辨民
志靡一義恭所陳寔允禮度九條之格猶有未盡謹共
附益二十四條聽事不得南向坐施帳并藩國官正冬
不得跣登國殿及夾侍國師傅令及油戟公主王妃傳
令不得朱服輦不得重櫛郭扇不得雉尾劔不得鹿盧
形槩旄不得孔雀白氍夾轂隊不得絳襖平乘誕馬不
得過二匹從騎不得綵衣舞伎正冬着袵衣不得裝回
冬會不得鐸舞柸柈舞長踏透狹舒劔博山緣大幢升

五案自非正冬會奏舞曲不得舞諸妃主不得着緄帶
信幡非臺省官悉用絳郡縣內史相及封內官長於其
封君既非在三罷官則不復追敬不合稱臣宜止下官
而已諸鎮常行車前後不得過六隊白直夾轂不在其
限刀不得過銀銅為飾諸王女封縣主諸王子孫襲封
之王妃及封侯者夫人行竝不得鹵簿諸王子繼體為
王者婚葬吉凶悉依諸國公侯之禮不得同皇弟皇子
車非輅車不得油幢平乘船皆下雨頭作露平形不得

擬象龍舟悉不得朱油帳鐫不得作五花及豎筍形

又條制諸王府鎮表

義恭徵為揚州刺史以避世祖寵子西陽王子尚解

揚州進位太宰領司徒常慮為上所疑及海陵王休茂於襄陽為亂乃表上條制

古先哲王莫不廣植周親以屏帝宇諸侯受爵亦願永固邦家至有管蔡梁燕致禍周漢上非顯授之恩下亡血食之業夫善積慶深宜享長久而歷代侯王甚乎匹庶豈異姓皆賢宗室悉不賢由生於深宮不覩稼穡左右近習未值田蘇富貴驕奢自往而至聚毛折軸遂乃

危禍漢之諸王並置傳相猶不得禁逆七國連謀寔由
強盛晉氏列封正足成永嘉之禍尾大不掉終古同疾
不有更張則其源莫救日者庶人恃親殆傾王業去歲
西寇藉寵幾敗皇基不圖襄楚復生今釁良以地勝兵
勇獎成凶惡前事之不忘後事之明兆陛下大明紹祚
垂法萬葉臣年衰意塞無所知解忝皇族者長慙慨內
深思表管見裨崇萬一竊謂諸王貴重不應居邊至于
華州優地時可暫出既以有州不須置府若位登三事

止乎長史掾屬若宜鎮御別差扞城大將若情樂冲虛
不宜逼以戎事若捨文好武尤宜禁塞僚佐文學足充
話言遊梁之徒一皆勿許文武從鎮以時休止妻子室
累不煩自隨百僚修詣宜遵晉令悉須宣令齊到備列
賓主之則衡泌之士亦無煩干候貴王器甲於私為用
蓋寡自金銀裝刀劍戰具之服皆應輸送還本曲突徙
薪防之有素庶善者無懼惡者止姦

山陰縣民墾起湖田議奏

孔靈符會稽山陰人
大明中為丹陽尹山

陰民多田少靈符表徙無貲之家於餘姚鄞
鄞三縣界墾起湖田世祖使公卿博議義恭

等議上從其徙
民並成良業

夫訓農脩本有國所同土著之民習翫日久如京師無

田不聞徙居他縣尋山陰豪族富室頃畝不少貧者肆

力非為無處耕起室荒無救災歟又緣湖居民魚鴨為

業及有居肆理無樂徙

杜氏通典議魚鴨為業下云小
人習始既難勸之未易遽廢之

疇方翦荆棘率課窮乏其事
彌難資徒粗立徐行無晚

尚書令柳元景右僕射劉秀之尚書王瓚之顧

凱之顏師伯嗣湘東王諱議

富戶溫房無假遷業窮身寒室必應徙居葺宇疏臯產
粒無待資公則公未易充課私則私卒難具生計既完
畬功自息宜募亡叛通卹及與樂田者其往經創須粗
修立然後徙居

侍中沈懷文王景文黃門侍郎劉歆郅顯議

百姓雖不親農不無資生之路若驅以就田則坐相違
奪且鄞等三縣去治並遠既安之民忽徙他邑新垣未

立舊居已毀去留兩困無以自資謂宜適任民情徙其所樂開宥逋亡且令就業若審成腴壤然後議遷

太常王玄謨議

小民貧匱遠就荒疇去舊即新糧種俱闕習之既難勸之未易謂宜微加資給使得肆勤明力田之賞申怠惰之罰

光祿勳王昇之議

遠廢之疇方剪荆棘率課窮乏其事彌難資徒粗立徐

行無晚

請還彭城王義康屬籍表

義康被殺六子惟長子永初封泉陵侯元

凶殺之前廢帝永光元年太宰江夏王義恭上表詔許

臣聞忝祖遠之猶或慮親降霍省序義重令戚故嚴道
疾終嗣啓方字阜陵愆屏身選晚恩竊惟故庶人劉義
康昔昧奸回自貽非命沈魂漏籍垂誠來典運革三朝
歲盈三紀天地改朔日月再升陶形賦氣咸蒙更始義
康妻息漂沒早違盛化衆女孤弱永淪黔首卽情原豐

本非已招感事哀憊俯增傷咽敢緣陛下聖化融泰春
澤覃被慈宥羣生仁被泉草實希洗宥還齒帝宗則施
及陳茲榮施污壤臣特憑國私冒以誠表塵觸靈威伏
紙悲悽

前廢帝詔報

太宰表如此公緣情追遠覽以增慨昔淮楚推恩胙流
支盾抑法弘親古今成準使以公表付外依旨奉行故
泉陵侯允橫罹凶虐可特為置後

劾蔡興宗求益州表

興宗為民部尚書轉掌吏部前廢帝即位義恭錄尚

書事受遺輔政引身避事政歸近習而興宗歲規得忤出興宗吳郡太守固辭又轉為東海太守不拜苦求益州義恭大怒上表詔外詳議因復使尚書柳元景奏興宗及尚書袁

愍孫免官除興宗新昌太守郡屬交州朝廷嗟駭

臣聞慎節言語大易有規銓序九流無取裁缺若乃結

黨連羣譏訴互起街談巷議罔顧聽聞乃撤實憲制所

宜禁經之巨蠹侍中秘書監臣或自表父疾必求侍養

聖旨矜體特順所陳改授臣府元僚兼帶軍郡雖臣駑

劣府任非輕准之前人不為屈後京郡本以為祿不計
戶之多少遇缺使用無闕高下撫軍長史莊滯府累朝
每陳危苦內職外守稱未堪依唯王球昔比賜以優養
恩慈之厚不近於薄前新除吳郡太守興宗前居選曹
多不平允鴻渥含宥恕其不閑改任大都寵均阿輔仍
苦請益州雅違成命伏尋揚州刺史子尚吳興太守休
若並國之茂戚魯衛攸在猶牧守東山竭誠撫莅而辭
擇適情起自庶族逮佐北藩尤無欣荷御史中丞永昔

歲餘愆從恩今授光祿勳淹雖曰代臣累經降黜後効未申以何取進司徒左長史孔凱前除右衛尋徙今職回換之宜不為乃少竊外談謂或等咸為失分又聞興宗躬自怨懟與尚書右僕射師伯疏辭旨甚苦臣雖不見所聞不虛臣以凡才不應機務謬自幸會受任三朝進無古人舉賢之美退無在下獻替之績致茲紛紜伏增慙悚然此源不塞此風不變將虧正道塵穢盛猷伏願聖聽賜垂覽察

前廢帝詔報

太宰表如此省以憮然朕恭承洪緒思弘盛烈而在朝
凌競驅扇成風將何以式揚先德克隆至化公體國情
深保釐攸託便可付外詳議

尚書柳元景奏

臣義恭表詔書如右攝曹辨覈尚書袁愍孫牒此月十
七日詣僕射顏師伯語次因及尚書蔡興宗有書固辭
今授仍出疏見公乃者數紙不意悉何所道緣此因及

朝士當今聖世不可使人以為少今牒數之朝廷處之實得所臣等亦自謂得分常多在門袁愍孫無或措多而愚意欲啓更量出內之宜芻蕘管見願在聞徹選令史宣傳密事故因附上聞亦外人言此今辭慶先列今月十八日往尚書袁愍孫論選事愍孫云昨詣顏僕射出蔡尚書疏見示言辭甚苦又云所得亦少主上踐阼始爾朝士有此人不多物議謂慶美用乃更恨少使咨事便啓錄公又謝莊當時未老其疾以轉差今居此任

復為非宜謂宜中書令才望為允又孔覲南士之美所
歷已多近頻授即復回改於理為曲門下無人此是名
選又張求人地可論其去歲愆戾非為深罪依其望復
門下一人張淹替忝南下預因休戚雖屢經愆黜事亦
已久謂應祕書監帶授興宗手跡數紙文翰炳然事證
明白不假覈辨愍孫任居官人職掌銓裁若有未久則
宜顯言而私加許與自相選署託云物論終成虛詭隱
未出端還為矛盾臣聞九官成讓虞風垂則誹主怨時

漢罪夙斷況義為身發言謗朝序亂辟害政混穢大猷
紛紜彰謬上延詔旨不有霜准軌憲斯淪請解興宗新
附官須事御收付廷尉法獄治罪免愍孫所居官

前廢帝詔報

興宗首亂朝典允當明憲以其昔經近侍未忍盡法可
令思愆遠封愍孫竊評自己委咎物議可以子領職

啓太祖

沈邵為鍾離太守有惠政
義恭啓太祖徙盱眙不許

盱眙太守劉顯真求自解說邵往莅任有政績彰於民
聽若重授盱眙足為良二千石

詔答

其願遷經年方復作此流遷必當大罔罔也

宋文帝
中詔

謝賜金梁鞍啓

賜臣供御金梁橋鞍制作精巧宜副龍駟聖慈下逮猥

垂光錫

初學
記

謝賜笏等啓

聖恩優重猥賜華纓玉笏珍冠首飾環板耀握非臣朽

薄所宜服受也

相手版經此非出相手版經蓋初學記引注誤接義恭此啓耳

謝賜鍼縷等啓

聖恩賜金銀鍼七色縷并格一犀棟刷匣副綿布兆珍

服寶玩以協嘉辰

北堂書鈔又謝袍啓賜臣金獸袍珍製巧飾太平御覽戴啓事垂賜金

虎魄茱萸囊紺裏副之七寶校裝玉眼明囊又啓事洪恩覃被賜臣息伯倫桎屋二間又啓事詔旨以赦

日所制綾紋錦布袍故生古具袍垂重賜

謝賜櫛榔啓

奉賜交州所獻檳榔味殊常品塗遠蒔醬

謝賜柿啓

敕旨垂賜華林園柿出自神苑滋味殊絕

並太平御覽藝文類聚

義恭謝啓手敕賜華林櫻桃其下云為樹則多陰為果則先熟故種之于廳事之前有蟬鳴焉顧命黏取以弄乃傳成黏蟬賦序也誤併為啓

答太祖書

雷次宗隱退徵辟不就太祖為築招賢館鍾山及卒太祖與義恭書道次宗亡義恭答書

雷次宗不救所疾甚可痛念其幽棲窮數自賓聖朝克

已復禮始終若一伏惟天慈弘被亦垂矜愍

宋書

與王玄謨書

王玄謨為寧朔將軍任北征前鋒圍滑臺積
旬不克後敗守碯礮義恭為征討都督召令
還為魏軍所追大破之流矢中
臂還至歷城義恭與玄謨書

聞因敗為成臂上金創得非金印之徵也

宋書南史
將非金印之

徵耶

華林四瑞桐樹甘露頌

初學記

遠延鳳翽遙集鸞步惠潤何廣霑我明庶

衡陽王義季

武帝子歷
徐州刺史

與江夏王義恭書

宗炳卒義季與義恭書炳字
少文南陽涅陽人累辟不就

宗居士不救所病其清履肥素終始可嘉為之惻愴不

能已已

宋書

啓文帝

劉道產累遷雒州刺史襄陽太守在雒
政績尤著及卒義季為荊州刺史咎上

故輔國將軍劉道產患背癰疾遂不救道產自鎮漢南

境接凶寇政績既著威懷兼舉年時猶可方宣其用奄至殞沒傷怨特深伏惟聖懷愍惜兼至

宋書

南郡王義宣

武帝第子

起兵上孝武帝表

元凶弒立義宣起兵傳檄遠近會世祖入討又率衆助為

前部事平進中書監改封南郡王累授荆襄二州刺史初臧質陰有異志以義宣凡弱欲假手為亂每密說義宣以有大才負大功宜在人前早有處分而世祖閨庭無禮與義宣諸女淫亂義宣怨憤報豫州刺史魯爽等克孝建元年秋冬舉事爽狂酒失旨其年正月便反義宣狼狽起兵因上表世祖詔答太傅江夏王義恭又與義宣書兵敗誅

臣聞博陸毗漢獲疑宣后昌國翼燕見猜惠王常謂異
姓震主嫌隙易構葭莩淳戚昭亮可期臣雖庸懦少希
忠謹值巨逆滔天忘家殉國雖歷算有歸微績不樹竭
誠盡愚貫之幽顯而微疑莫監積毀日聞投杼之聲紛
紜濫聽諒緣奸臣交亂成是貝錦夫澆俗之季少貞節
之臣冰霜競至靡後彫之木並寢處凶世甘榮僞朝皆
纓冕之所棄投畀之所取至乃位超昔寵任叅大政惡
直醜勲妄生邪說疑惑明主誣罔視聽又南從羣僚勞

不足紀橫叨天功以為已力同弊相扇圖傾宗社賊質
去歲忠節勲高古賢魯爽協同大義志契金石此等猜
毀必欲禍陷昔汲黯尚存劉安寢志孔父既逝華督縱
逆臣雖不武績著艱難復肆讒狡規見誘召宗社之危
綴旒非所臣託體皇基連暉日月王室顛墜咎在微躬
敢忘抵鼠之忌甘受犯墉之責輒徵召甲卒分命衆藩
使忠勤申憤義夫効力戮此凶醜謝愆闕庭則進不負
七廟之靈退無愧二朝之遇臨表感愧辭不自宣

孝武帝詔答南郡王義宣

皇帝敬問朕以不天招罹屯難家國阽危剪焉將及所以身先八百雪清寃恥遠憑高竿共濟艱難遂登寡闇嗣奉洪祀尊戚酬勲寔表心事批政闕職所願匡拯而嘉言蔑聞末德先著勤王之績未終毀冕之圖已及臧質嶮躁無行見棄人倫以此不識志在問鼎凶意將逞先借附從扇誘欺熾成此亂階如使羣逆並濟衆邪競逐將恐瞻烏之命未識所止構怨連禍孰知其極公明

有不照背本崇姦迷昵讒醜還謀社稷雖履霜有日誼
議糾紛朕以至道無私杜遏疑議信理推誠暴于遐邇
不慮物變難籌醜言遂驗是用悼心失圖忽忘寢食今
便親御六師廣命羣牧告靈哲衆直造柴臬轅元惡
以謝天下然後警蹕清江鳴鑾郢路投戈襲衮面稟規
勛有宋不造家禍仍纏昔歲事寧方承遠訓冀以虛薄
永弭厥艱豈謂曾未暮稔復覩斯疊二祖之業將墜于
淵仰瞻鴻基但深感慟

宋書

江夏王義恭與義宣書

以下附類

頃聞之道路云二魯背叛致之有由謂不然之言絕於智者之耳忽見來表將興晉陽之甲警愕駭惋未譬所由若主幼臣彊政移冢宰或時昏下縱在上畏逼然後賢藩忠構覩難赴機未聞聖王御世百辟順軌稱兵於言興之初扶危於既安之日以此取濟竊為大弟憂之昔歲二凶構逆四海同奮弟協宣忠孝奉戴明主元功盛德既已昭著皇朝欽嘉又亦優渥丞相位極人臣江

左罕授一門兩王舉世希有表信推誠彰于見事出納之宜惟意所欲裨升進益方省後命一旦棄之可謂運也吾等荷先帝慈育得及人羣思報厚恩昊天罔極竭力盡誠猶懼無補柰何妄聽邪說輕造禍難國靡流言遽歸愆於二叔世無鼂錯仍襲轍於七藩棄漢蒼之令範遵齊罔之敗跡往時仲堪假兵靈寶旋害其族孝伯授之劉牢忠誠逝踵皆曩代之成事當今之殷鑒也臧質少無美行弟所具悉憑恃末戚竝有微勤承乏推遷

遂超倫伍藉西楚彊力圖濟其私凶謀若果恐非復池中物魯宗父子世為國寬太祖方弘遐略故爽等均雍齒之封今據有五州虎兕出于柙是須為劉淵耳徐遺寶是垣護之婦弟前因護之歸于吾苦求北出不樂遠西近磐桓湖陸示遣劉雍其意可見雍是徐冲舅適有密信誓倒戈自敵侵境以來公私彫弊安以撫之庶可寧靜弟復隨而擾亂吾恐邊鄙皆為禾黍宜遠尋高祖創業艱難近念家國比者禍豐時息兵戈共安社稷責

躬謝過誅除險佞追保前勲傳美竹帛昔梁孝悔罪景
帝垂恩阜質改過肅宗降澤忠馬之誨聊希往言禍福
之機明者是察主上神武英斷羣風如林忠臣發憤虎
士投袂雄騎布野舳艫蓋川吾以不才忝權節鉞總督
羣帥首戒戎先指晨電舉式清南服所以積行緩期冀
弟不遠而悟如其遂溺姦說者天實為之臨書慨慙不

識次第

宋書 二魯者爽及弟秀旋害通鑑作尋害孝
伯二句作孝伯推誠牢之旋踵而敗 密信疑

是適有
信密誓

又書

臧質始聞國禍便有異圖以義宣凡閭欲外相推奉以成其志質女為義宣子採妻謂質無復異同且義宣腹心將佐勸獎義宣舉兵義恭與義宣書由此與質相疑

昔桓玄借兵於仲堪有似今日

沈慶之與義宣書

慶之字弘先武康人歷太尉廢帝賜死

義宣至尋陽與臧質西下至鵲頭聞所遣徐遺寶敗魯爽於小峴授首相視失色世祖使鎮北大將軍沈慶之送爽首示義宣并與書

僕荷任一方而釁生所統近聊率輕師指往翦撲軍鋒

我交賊爽授首公情契異常或欲相見及其可識指送相呈

答義宣書

謝莊為沈慶之答義宣書

皇綱絕而復紐區宇墜而更維

選注

王玄謨報義宣書

玄謨事彥德太原祁人歷南豫州刺史

上遣豫州刺史王玄謨舟師頓梁山洲內東西兩岸為却月城營柵甚固義宣屢與玄謨

書要令降玄謨書報之

頻奉二誨伏對戰駭先在彭泗聞諸將皆云必有今日

之事以鄙意量謂無此理去年九月故遣叅軍先僧瑗
修書表心并密陳入相之計欲使周旦之美復見于今
豈意理數難推果至於此昔因幸會蒙國士之顧思報
厚德甘起泉壤豈謂一旦事與願違公崇長姦回自放
西服信邪細之說忘大節之重溺流狡之志滅君親之
恩狎玩極寵越希非覬祖宗世祀自圖顛覆瞑目行事
未有如斯之甚者也乃復枉覃書檄遠示見招此則丹
心微歟未亮於高鑑赤誠幽志虛感於平日環念周回

始悟知己之為難也公但念提職在昔不思善教有本
徒見徐魯去就未知仗義有人豈不惜哉有臣則欲其
忠誘人而導諸逆君子忠恕其如是乎苟不忠恕則擇
木之翰有所不集矣夫挑妄者愛其易求妻則敬其難
若承命如響將焉用之原轂存與無禮必及竊恐荆郢
之士已當潛貳其懷非皇都陋臣秉義不徙公雖心迷
迹往猶願勉建良圖柳撫軍忠壯慷慨亮誠有素新亭
之勲莫與為等而妄信姦虛坐相貶謗不亦惑哉幸承

人乏夙誠前驅精甲已次近路鎮軍駱驛繼發太傅驃
騎嗣董元戎乘輿親御六師威靈遐振人百其氣慕義
如林舟騎雲回赫奕千里輒屬韃東銳與執事周旋授
命當仁理無所讓夫君道既盡民禮亦絕執筆裁答感
慨交懷

撫軍柳元景據姑孰為大統
太傅驃騎即江夏王義恭

江夏王義恭諸王公八座與荊州刺史朱修之


書

修之字恭祖義興平氏人義宣之起時為雍
州刺史歸順孝武以為荊州刺史加都督義
宣敗逃夜還向城入南郡空廨竺超民遣故
車一乘載送刺姦義恭等與修之事書書未達

修之至江陵
已於獄盡焉

義宣反道叛恩自陷極逆大義滅親古今同准無將之
誅猶或囚殺况醜文悖志宣灼遐邇鋒指絳闕兵纏近
郊豐逼憂深臣主旰食賴朝略震明祖宗靈慶罪人斯
得七廟弗隳司刑定罰典辟攸在而皇慈逮下愍其愚
迷抑法申情屢奏不省人神悚遑省心震惕義宣自絕
于天理無容受社稷之慮臣子責深便宜專行大戮以
紓國難但加諸斧鉞有傷聖仁示以弘恩使自為所上

全天德下一洪憲臨書悲慨不復多云



宋文紀卷五

欽定四庫全書

集部

宋文紀卷六

詳校官庶吉士_臣瑚圖禮

主事銜_臣徐以坤覆勘

總校官進士_臣楊懋珩

校對官中書_臣李斯咏

謄錄監生_臣王爾熙

欽定四庫全書

宋文紀卷六

明梅鼎祚編

元凶劭

字休遠文帝長子弒逆伏誅

即偽位書

弒文帝并殺尚書僕射徐湛之又殺吏部尚書江湛即偽位為書初使

蕭斌作詔斌辭以不文乃使侍中王僧綽為之

徐湛之江湛弒逆無狀吾勒兵入殿已無所及號惋崩
劬肝心破裂今罪人斯得先凶克殄可大赦天下改元
嘉三十年為太初元年文武並賜位二等諸科一依丁

外

臧敦等復本位書

元凶弒立以質為丹陽尹質時為雍州刺史馳告南郡王

義宣又遣告世祖率衆五千馳下討逆質諸子在都邑聞質舉義並逃亡劬欲相慰悅乃

下書厚給賜之

臧敦等無因自駭急便竄逸迷昧過甚良可怪歎質國戚勲臣忠誠篤亮方當顯位贊翼京輦而子弟波迸傷其乃懷可遣宣譬令還咸復本位

始興王濬

字休明文帝第二子預逆伏誅

吳興開漕事奏

洛為揚州刺史元嘉二十二年上言從之功竟不立

所統吳興郡衿帶重山地多汙澤泉流歸集疏決遲壅
時雨未過已至漂沒或方春輟耕或開秋沈稼田家徒
苦防遏無方彼邦輿區地沃民阜一歲稱稔則穰被京
城時或水潦則數郡為災頃年以來儉多豐寡雖賑賚
周給傾耗國儲公私之弊方在未已州民姚嶠比通便
宜以為二吳晉陵義興四郡同注太湖而松江滬瀆壅
噎不利故處處涌溢浸漬成災欲從武康紵溪開漕谷

湖直出海口一百餘里穿渠浚必無閼滯自去踐行量
度二十許載去十一年大水已詣前刺史臣義康欲陳
此計即遣主簿盛曇泰隨嶠周行互生疑難議遂寢息
既事關大利宜加研盡登遣議曹從事史虞長孫與吳
興太守孔山士同共履行准望地勢格評高下其川原
由厯莫不踐校圖畫形便詳加竿考如所校量決謂可
立尋四郡同患非獨吳興若此浚獲通列邦蒙益不有暫
勞無由永晏然興創事大圖始當難今欲且開小漕觀

試流勢輒差烏程武康東遷三縣近民即時營作若宜
更增廣尋更列言昔鄭國敵將史起畢忠一開其說萬
世為利嶠之所建雖則芻蕘如或非妄庶幾可立

與沈璞疏

始興王濬為揚州刺史璞為主簿嘗為舊宮
賦久而未畢濬與璞疏璞因事陳答辭義可
觀濬重下教又與主
簿顧邁孔道存書

卿常有速藻舊宮何其淹耶想行就耳

又教

卿沈思淹日向聊相敦還白斐然遂兼紙翰昔曹植有
言下筆成章良謂逸才瞻藻誇其辭說以今况之方知
其信執省躊躇三復不已吾遠慙楚元門盈申白之賓
近愧梁孝庭列枚馬之客欣慙交至諒惟深矣薄因末
牘以代一面

與主簿顧邁孔道存書

沈璞淹思踰歲卿研慮數旬瓌麗之美信同在昔向聊
問之而還答累翰辭藻豔逸致慰良多既欣股肱備此

髦楚還慙予躬無德而稱復裁少字宣志於璞聊因尺

紙使卿等具知厥心

並宋書

又與沈璞書

璞為盱眙太守臧質共破魏人臧質以璞城主使自上露板璞性謙厚推功于質質露板亦不及焉太祖嘉璞功効遣中使深相褒美濬及王僧達並與璞書

魏人狂凶自送近服偽將即斃酋長傷殘實天威所喪
卿諸人忠勇之効也吾式遏無素致境蕪民瘠負乘之
愧允當其責近乞退謝愆不蒙垂許故以報卿

答元凶劄書

文帝太子劄與弟濬並多過失慮上知使女
巫嚴道育上天陳請欲令過不上聞劄等敬
事號曰天師遂為巫蠱以玉人為上形像埋
於含章殿前劄妙東陽主應閭婢王鸚鵡及
其養子陳天興黃門慶國等並預其事劄以
天興補隊主東陽主薨劄慮言語難密與濬
謀嫁鸚鵡與濬府佐沈懷遠為妾因臨賀公
主啓上上遣人詰讓劄懼馳書告濬濬答書
凡劄濬相與書疏皆為名號謂上為彼人或
以為其人以江夏王義恭為佞人東陽主第
在西掖門外故云南第王即鸚鵡姓躬上啓
聞者令道育上天白天神也懷遠慮鸚鵡與
天興私通請劄殺之慶國具以其事白上上
驚惋即遣收鸚鵡封籍其家得劄濬書數百

紙皆咒咀巫蠱之言得所埋像于宮內道育
變服為尼逃匿東宮濬往京口又載以自隨
及濬自京口入朝遣還京為行留處分至京
數日而事發上使左右朱法瑜密責讓濬辭
甚哀切并賜書濬當鎮江陵復載道育往東
宮欲將西上事洩須檢覈廢劾賜濬死濬報
劾因謀弑逆世
祖討並誅之

奉令伏深惶怖啓此事多日今始來問當是有感發之
者未測源由耳計臨賀故當不應翻覆言語自生寒熱
也此姁由來挾兩端難可孤保正爾自問臨賀冀得審
實也其若見問當作依違答之天興先署先人府仕不

審監上當無此簿領耳急宜捷之殿下已見王未宜依此具令嚴自躬上啓聞彼人若為不已正可保其餘命或是大慶之漸

文帝賜始興王濬書

類附

鸚鵡事想汝已聞汝亦何至迷惑乃爾且沈懷遠何人其詎能為汝隱此耶故使法瑜口宣投筆惋慨

與元凶劄書

當元凶劄弒逆召濬問狀濬勸殺荀赤松等已及劄將敗勸劄入海輦珍寶綰帛下船乃

復與劭書人情離散故行
計不果所云尼即嚴道育

船故未至今晚期當於此下物令畢願速救謝賜出船
艦尼已入臺願與之明日決也臣猶謂車駕應出此不
爾無以鎮物情

又與世祖書

初世祖爲武陵王入討元凶傳檄京邑劭使
澹又與世祖書烏羊者南平王鑠法師者世
祖之世
子小名

聞弟忽起狂檄阻兵反噬縉紳憤歎義夫激怒古來陵

上內侮誰不夷滅弟洞覽墳籍豈不斯具今主上天縱
英聖靈武宏發自登宸極威澤兼宣人懷甘死之志物
競含生之節弟蒙眷遇著自少長東宮之懼其來如昨
而信惑奸邪忘茲恩友此之不義人鬼同疾今水步諸
軍悉已備辦上親御六師太保又秉鉞臨統吾與烏羊
相尋即道所以淹寢緩電者猶冀弟迷而知返耳故畧
示懷言不盡意主上聖恩每厚法師今在殿內住想弟
欲知消息故及

並宋書

南平王鏐

字休立文帝第四子歷侍中司空初爲元凶所任孝武帝毒殺之

答魏若庫辰樹蘭移書

時疆場之民多相侵盜宋元嘉二十五年魏豫州刺史北并侯若庫辰樹蘭移書豫州宋

王鏐刺史南平王鏐鑠答之

知以邊氓擾動多有叛逆欲杜絕姦宄兩息民患又欲
迭迭奔亡禁其來往申告嘉貺實獲厥心但知和好以
來矢言每缺侵軼之弊屢違義舉任情背叛專肆暴畧
豈惟竊犯王黎乃害及行使頃誅討蠻髦事止畿服或

有狐奔鼠竄逃首北境而輒便苞納待之若舊資其糧
仗縱爲寇賊往歲擅興戎旅禍加孩老罔顧善鄰之約
不惟疆域之限來示所云彼並行之雖豐辭盈觀即事
違實興嫌長亂實彼之由反以爲言將違躬厚之義疆
場之民有自來矣且相期有素本不介懷若於本欲消
奸弭暴永存匪石宜先謹封守斥遣諸亡驚蹄逸鏃不
妄入境則邊城之下外戶不閉王制嚴明豈當獨負來
信若王命奔越侵盜彼民斯固刑之所取無勞遠及自

荷閫外思闡皇猷每申飭守宰務敦義讓往誠未布能
不愧作當重約示以副至懷

並宋書

竟陵王誕

字休文文帝第六子

奉孝武帝表

世祖入討元凶誕時爲會州刺史并勢舉兵有奔牛之捷及南郡王

義宣反處分平定皆誕力也上頗相疑憚出爲南兗州刺史誕既見猜亦潛爲之備道路常云誕反建平三年有建康民陳文紹等之告上乃使有司奏貶爲侯遣令之國以義興太守桓閭爲兗州刺史使襲誕至廣陵爲誕所殺遂遣車騎大將軍沈慶之討之誕奉表投之城外拒戰城陷見害

往年元凶禍逆陛下入討臣背凶赴順可謂常節及承
相構難臧魯協從朝野恍惚感懷憂懼陛下欲百官羽
儀星馳推奉臣前後固執方賜允俞社稷獲全是誰之
力陛下接遇慇懃累加榮寵驃騎揚州旬月移授恩秩
頻加復賜徐充仰屈皇儲遠相餞送臣一遇之感感此
何忘庶希偕老永相娛慰豈謂陛下信用讒言遂令無
名小人來相掩襲不任枉酷即加誅剪鼠雀貪生仰違
詔敕令親勒部曲鎮扞徐充先經何福同生皇家今有

何憊便成秦越陵鋒奮戈萬沒豈顧盪定以期冀在旦
夕右軍宣蘭爰及武昌皆以無罪並遇枉酷臣有何過
復致於此陛下宮帷之醜豈可三緘臨紙悲塞不知所
言

陳文紹告竟陵王誕擅殺書

私門有幸亡大姑元嘉中蒙入臺六宮薄命早亡先朝
賜贈美人又聽大姑二女出入問訊父饒司空誕取爲
府史恒使入山圖畫道路勤劇備至不敢有辭不復聽

歸消息斷絕姑二女去年冒啟歸訴蒙陛下聖恩賜赦
解饒吏名誕見符至大怒喚饒入交問汝欲死耶訴臺
求解饒即答官比不聽通家信消息斷絕若是妙爲啟
聞所不知誕因問饒汝那得入臺饒被問依實啟答既
出誕主衣莊慶畫師王強語饒汝今年敗汝妙誤汝官
云小人輩敢持臺家逼我饒因叛走歸誕卽遣王強將
數人逐突入家內縛錄將還廣陵至京口客舍乃墜死
井中託云饒懼梟自殺抱痛懷冤冒死歸訴

劉成告竟陵王誕謀反書

息道龍昔伏事誕親見姦狀又見誕在石頭城內修乘
輿法物習倡警蹕道龍私獨憂懼向伴侶言之語頗漏
泄誕使大吏令監內執道龍道龍逸走誕怒鞭殺監又
捕殺道龍

陳談之訴枉書

弟誅之昔蒙誕采錄隨從歷鎮大駕南下爲誕奉送賤
書經陟危險時得上聞聖明登阼恩澤周普回改小人

使命微勤賜署臺位詠之恒見誕與左右小人莊慶傳
元祀潛圖姦逆言詞醜悖每云天下方是我家有汝等
不憂不富貴又常䟽陛下年紀姓諱往巫鄭師憐家祝
詛詠之既聞此語又不見其事恐一旦事發橫罹其罪
密以告建康右尉黃宣達并有啟聞希以自免元祀弟
知詠之與宣達來往自謙言語漏泄即具以告誕誕大
怒令左右飲詠之酒逼使大醉因言詠之乘酒罵詈遂
被害自顧冤枉事有可哀

有司奏貶竟陵王誕

臣聞神極尊明大儀所以貞觀皇天峻邈玄化所以幽
宣故能經緯眚俗大庇黔首庶道被八紘不遺疏賤之
賞威格天區豈漏親貴之罰此不刊之鴻則古今之恒
訓謹按元嘉之末天綱崩褫人神哀憤含生喪氣司空
竟陵王誕義兼臣子任居藩維進不能泣血提戈忘身
殉節退不能閉關拒險焚符斬使遂至拜受偽爵欣承
榮寵沉淪姦逆肆于昏放以妻故司空臣湛之女誅亡

遺類單舟遙遣披猖千里事哀行路賊忍無親莫此為甚故山陰傳僧祐誠亮國朝義均休戚重門峻衛不能拒折簡之使巖險千里不能庇匹夫之身乃更助虐馮凶抽兵勒刃遂使頓仆牢穽死不旋踵妻子播流庭筵莫立見之者流涕聞之者含歎及神鋒首路櫓檣東指風卷四嶽電掃三江誕猶持疑兩端陰規進退陛下頻遣書檄告譬殷勤方改姦圖末乃奉順分遣弱旅永塞符文宴安所莅身不越境悖禮忘情不顧物議譬弧躍

馬務是畋游致奔牛有崩碎之陳新亭無獨克之術假
威義銳乞命皇旅竟有何勞而論功伐既蒞祿廊清大
明升曜幽顯宅心遠邇雲集誕忽星行之悲違開泰之慶
遲回顧望淹踰旬朔逆黨陳叔兒等泉寶巨億資貨不
貲誕收籍所得不歸天府辭稱天軍實入私室又太官
東傳舊有獻御喪亂既平猶加斷遏珍羞庶品回充私
贍于號諱之辰遽甘滋之品當惟新之始絕苞苴之貢
忠孝兩忘敬愛俱盡乃徵引巫史潛考圖緯自謂體應

符相富貴可期悖意醜言不可勝載遂復遙諷朝廷占求官爵侮蔑宗室詆毀公卿不義不昵人道將盡荷任神州方懷姦慝每闕向宸御妄生規幸多樹淫祀顯肆祿誚遂在石頭潛修法物傳警稱蹕擬則天行皆已駭暴觀聽彰布朝野昔內難甫寧珍瑋散佚有御刀利刃擅價諸夏天府禁器厯代所珍誕密加購賞頓藏私室賊義宣初平餘黨逃命誕含縱罔忌私竊招納名工納巧悲匿私第又引義宣故將裘興為己腹心事既彰露

猶執欺罔公文面啓矯稱舊隸加以營于制館僭擬天
居引石徵材專擅興發驅迫士族役同輿皂殫木土之
娒窮吞并之勢故會稽宣長公主受遇二祖禮級尊崇
臣湛之亡身殉國追榮典軍誕以廣托宅宇地妨藝植
輒逼遺孤頸相驅徙遂令神主宵遷改卜委巷宗戚含傷
行路淹涕又緣谿兩道積代通衢誕拓宇開垣擅斷其
一致使徑途擁隔川陸阻礙神怒民怨毒徧幽顯故丞
相臨川武烈王臣道規名德茂親勲光常策異禮殊榮

受自先旨者嗣王臣義慶受任西夏靈寢暫移先帝親
枉鑒輿拜辭路左恩冠終古事絕常班誕又以廟居宅
前固請毀換詔旨不許怨懟彌地有覲面目豺狼為性
規牧江都希廣兵力天德尚弘甫申所請仍謂應住東
府宜為中台貪冒無厭人莫與比雖聖慈全救每垂容
納而虐戾不悛姦諛彌甚受命還鎮猜怨愈深忠規正
諫必加鴆毒諂瀆膚躁是與比周又矯稱符敕設榜開
募事發辭寢委罪自下及錄事徐靈壽以常署受坐將

就囚執旨韓近恭中護軍遣吏夏嗣伯密相囑請求寬
桎梏且王僧達臨刑之啓事高閣即戮之辭皆稱潛驛
往來遙相要契醜聲穢問宣諸遐邇含識能言孰不憤
歎又獲吳郡民劉成豫章民陳談之建康民陳文紹等
並如訴狀則姦情猜志歲月增積昔周德初升公旦有
流言之豐魯道方泰季子斷達泉之誅近則淮厲覆車
於前義康襲軌於後變發柴竒禍成范謝亦皆以義奪
親情為憲屈况乃上悖天經下誣政道結豐于无妄之

辰希幸于文明之日皇穹所不覆厚土所不容夫無禮之誠臣子所宜服膺千紀之刑有國所應慎守臣等參議宜下有司絕誕屬籍削爵土收付廷尉法獄治罪諸所連坐別下考論伏願遠尋宗周之重近監興亡之由割恩棄私俯順羣議則卜世靈根于茲克固鴻勲盛烈永永無窮陛下如復隱忍未垂三思則覆皇基於七百擠生民於塗炭此臣等所以夙夜危懼不敢避鈇鉞之誅者也

建平王宏

字休度文帝第七子
歷尚書令中書監

應讜言條議

宏為尚書左僕射明曉政事
時普責百官讜言宏上議

臣聞建國之道咸殊興王之政不一至於開諫致寧防
口取禍固前王同軌後王共則秦殷之敗語戮刺亡周
漢之盛謗升箴顯陛下以至德神臨垂精思治進儒禮
而崇寬教哀獄法而黜嚴刑表忠行而舉貞節辟處士
而求賢異修廢宮而出滯賞撤天膳而重農食禁貴遊
而弛權酷通山澤而易關梁固已海內仰道天下知德

今復開不諱之塗獎直辭之路四海希風普天幸甚舉
蒙採問敢不悉心謹條鄙見置陳如左辭理違謬伏用
震讐夫用兵之道自古所慎頃干戈未戢戰備宜修而
卒不素練兵非夙習且戎衛之職多非其才或以資厚
素加或以祿薄帶帖或寵由權門恩自私假既無將領
虛尸榮祿至于邊城舉燧羽驛交馳而望其擐甲推鋒
立功閫外譬緣木求魚不可得矣常謂臨難命師皆出
倉卒驅烏合之衆隸造次之主貌疎情乖有若秦越豈

能使其同力拔危濟難故奔北相望覆敗繼有今欲改
選將校皆得其人分臺見將各以配給領護二軍為其
摠統領撫養士卒使恩信先加農隙校獵以習其事三
令五申以齊其心使動止應規進退中律然後蓄銳觀
釁因時而動摧敵陷堅折衝于外孫子曰視卒如赤子
故可與之共死所以張劬効爭先之心吮癰致必盡之
命豈不由恩著者士輕其生令明者卒畢其力考心迹
事如或有在妄陳膚知追懼乖謬

郊廟宜備設樂議

孝建二年有司奏前殿中曹郎荀萬秋議郊廟樂於是使

內外博議竟陵王誕等五十一人並同萬秋議左僕射建平王宏丹陽尹顏竣議各不同

衆並依

宏議

荀萬秋議

按禮祭天地有樂者為降神也故易曰雷出地奮豫先王以作樂崇德殷薦之上帝以配祖考周官曰作樂於圜丘之上天神皆降作樂於方澤之中地祇皆出又曰乃奏黃鍾歌大呂舞雲門以祀天神乃奏大簇歌應鍾

舞咸池以祀地祇由斯而言以樂祭天地其來尚矣今
郊享闕樂竊以為疑祭統曰夫祭有三重焉獻屬莫重
于裸聲莫重於升歌舞莫重于武宿夜此周道也至於
秦奏五行魏舞咸熙皆以用享爰逮晉氏泰始之初傳
玄作晉郊廟歌詩三十二篇元康中荀蕃受詔成父勗
業金石四縣用之郊廟是則相承郊廟有樂之證也今廟
祠登歌雖奏而象舞未陳懼闕備禮夫聖王經世異代
同風雖損益或殊降殺迭運未嘗不執古御今同規合

矩方茲休明在辰文物大備禮儀遺逸罔不具舉而況
出祇降神輟樂於郊祭昭德舞功有闕於廟享謂郊廟
宜設備樂

建平王宏議

聖王之德雖同創制之禮或異樂不相沿禮無因襲自
寶命開基皇符在運業富前王風振通古朝儀國章並
循先代自後晉東遷日不暇給雖大典略備遺闕尚多
至于樂號廟禮未該往正今帝德再昌大孝御寓宜討

定禮本以昭來葉尋舜樂稱韶漢改文始周樂大武秦
革五行春夫祖有功而宗有德故漢高祖廟樂稱武德
太宗廟樂曰昭德魏制武始舞武廟制咸熙舞文廟則
祖宗之廟別有樂名晉氏之樂正德大豫及宋不更名
直為前後二舞依據昔代義外事乖今宜釐改權稱以
凱容為韶舞宣烈為武舞祖宗廟樂摠以德為名若廟
非不毀則樂無別稱猶漢高文武咸有嘉號惠景二主
樂無餘名章皇太后廟依諸儒議唯奏文樂何休杜預

范甯注初獻六羽並不言佾者佾則干在其中明婦人無武事也郊祀之樂無復別名仍同宗廟而已尋諸漢志永至等樂各有義况宜仍舊不改宋及東晉太祝惟送神而不迎神近議者或云廟以居神恒如在也不應有迎送之事意以為並乖其哀立廟居靈四時致享以申孝思之情奉神升降無常何必恒安所處故祭義云樂以迎來哀以送往鄭注云迎來而樂樂親之來送往而哀哀親之返其享否不可知也尚書有神天又詩云

神保遙歸注曰歸於天地也此並云神有去來則有送迎明矣即周肆夏之名備迎送之樂古以尸象神故儀禮祝有迎尸送尸近代雖無尸豈可闕迎送之禮又傳玄有迎神送神歌辭明江左不迎非舊典也

丹陽尹顏竣議

德業殊稱則干羽異容時無沿制故物有損益至於禮失道謬稱習忘反中興釐運視聽所草先代繆章宜見刊正郊之有樂蓋生周易周官厯代著議莫不援准夫

掃地而祭器用陶匏唯質與誠以章天德文物之備理固不然周官曰國有故則旅上帝及四望又曰四圭有邸以祀天旅上帝兩圭有邸以祀地旅四望四望非地則知上帝非天孝經云郊祀后稷以配天宗祀文王于明堂以配上帝則豫之作樂非郊天地大司樂職奏黃鍾歌大呂舞雲門以祀天神鄭注天神五帝及日月星辰也王者以夏正月祀其所受命之帝于南郊則二至之祀又非天地考之衆經郊祀有樂未見明證宗廟之

禮事炳載籍爰自漢元迄乎有晉雖時或更制大抵相
因為不襲名號而已今樂曲淪滅知音世希改作之事
臣聞其語正德大豫禮容具存宜殊其徽號飾而用之
以正德為宣化之舞大豫為興和之舞庶足以光表世
烈悅被後昆前漢祖宗廟處各異主名既革舞號亦殊
今七廟合食庭殿共所舞蹈之容不得廟有別制後漢
東平王蒼已議之矣又王肅韓祗以王者德廣無外六
代四夷之舞金石絲竹之樂宜備奏宗廟愚謂蒼肅祗

議合於典禮適於當今

建平王宏又議

竣據周禮孝經天與上帝連文重出故謂上帝非天則易之作樂非謂祭天也按易稱先王以作樂崇德殷薦之上帝以配祖考尚書云肆類于上帝春秋傳曰告昊天上帝凡上帝之言無非天也天尊不可以一稱故或謂昊天或謂上帝或謂昊天上帝不得以天有數稱便謂上帝非天徐邈推周禮國有故則旅上帝以知禮天

旅上帝同是祭天言禮天者謂常祀也旅上帝者有故而祭也孝經稱嚴父莫大于配天故云郊祀后稷以配天宗祀文王于明堂以配上帝既天為議則上帝猶天益明也不欲使二天之同故變上帝爾周禮祀天之言再見故鄭注以前天神為五帝後冬至所祭為昊天竣又云二至之祀又非天地未知天地竟應以何時致享記云掃地而祭器用陶匏者明所用質素無害以樂降神萬秋謂郊宜有樂事有典據竣又云東平王蒼以為

前漢諸祖別廟是以祖宗之廟可得各有舞樂至於祫祭始祖之廟則專用始祖之舞故謂後漢諸祖共廟同庭雖有祖宗不宜入別舞此誠一家之意而未統適時之變也後漢從儉故諸祖共廟猶以異室存別室之禮晉氏以來登歌頌美諸室繼作至于祖宗樂舞何獨不可迭奏苟所詠者殊雖復共庭亦非嫌也魏三祖各有舞樂豈復是異廟耶

大駕屬車議

孝建元年有司奏尚書令建平王宏參議詔可

有司奏

案漢胡廣蔡邕並云古者諸侯貳車九乘秦滅六國兼其車服故王者大駕屬車八十一乘尚書御史乘之最後一車懸豹尾法駕則三十六乘檢晉江左逮至於今乘輿出行副車相承五乘

建平王宏參議

八十一乘義兼九國三十六乘無所准並不出經典自邕廣傳說又是從官所乘非帝者副車正數江左五乘

儉不中禮案周官云上公九命貳車九乘侯伯七命車七乘子男五命車五乘然則帝王十二乘

湘東太妃周忌議

孝建元年湘東國刺稱國太妃去三十年閏六月二十八

日薨未詳周忌當在六月為在七月勅禮官議正博士丘邁之議左僕射建安王宏謂宜以七月為祥忌

丘邁之議

案吳商議閏月亡者應以本正之月為忌謂正閏論雖各有所執商議為允宜以今六月為忌

建平王宏議

邁之議不可准據案晉世及皇代以來閏月亡者宜閏
之後月祥宜以來七月為祥忌

王偃喪服議

孝建三年三月有司奏勅禮官處
正重加研詳以宏議為准詔可

有司奏

故散騎常侍右光祿大夫開府儀同三司義陽王師王
偃喪逝至尊為服總三月成服仍即公除至三月竟未
詳當除服與不又皇后依朝制服心喪行喪三十日公

除至祖葬日臨喪當着何服又舊事皇后心喪服終除之日更還着未公除時服然後就除未詳今皇后除心制日當依舊更服為但釋心制中所着布素而已勒禮官處正

太學博士王應之議

通典王
膺之

尊卑殊制輕重有級五服雖同降厭則異禮天子止降旁親外舅總麻本在服例但衰經不可以臨朝享故有公除之議雖釋衰襲冕尚有總月之制愚謂至尊服三

月既竟猶宜除釋

又議

吉凶異容情禮相稱皇后一月之限雖過二功之服已
釋哀喪所極莫深于尸柩親見之重不可以無服案周
禮為兄弟既除喪以及其葬也反服其服輕喪雖除猶
畜哀以臨葬舉輕明重則其理可知也愚謂王光祿祖
葬之日皇后宜反齊衰

又議

喪禮即遠變除漸輕情與日殺服隨時改權禮既行服制已變豈容終除之日而更重服乎案晉太始三年武帝以朞除之月欲反重服拜陵頻詔勤勤思申棘心於時朝議譬執亦遂不果愚謂皇后終除之日不宜還著重服直當釋除布素而已

太常丞朱膺之議

凡云公除非全除之稱今朝臣私服亦有公除猶自窮其本制膺之云晉武拜陵不遂反服此時是權制既除哀

麻不可以重制耳與公除不同愚謂皇后除心制日宜如舊反服未公除時服以申創巨之情

國子博士蘓瑋生議

案三日成服即除及皇后行喪三十日禮無其文若並謂之公除則可粗相依准凡諸公除之設蓋以王制奪禮葬及祥除皆宜反服未有服之於前不除於後雖有齊斬重制猶為功總除喪夫公除暫奪豈可遂以即吉耶愚謂至尊三月服竟故應依禮除釋皇后臨祖及一

周祥除並宜反服齊哀

尚書令建平王宏議

至尊總制終止舉哀而已不須釋服

餘同朱膺之議

前祠部郎中周景遠議

權事變體五服俱革總麻輕制不容獨異謂至尊既已公除至三月竟不復有除釋之義

義陽王昶

字休道文帝第九子歷徐州刺史前廢帝時畏誅奔魏

請改葬竟陵王誕表

前廢帝即位昶為征北將軍徐州刺史道經廣陵上

表詔聽
禮葬

竊聞淮南中霧眷求遺緒楚英流殛愛存丘墓並難結
兩臣義開二主法雖事斷禮或情申伏見故賊劉誕稱
戈犯節自貽逆命膏斧嬰戮在憲已彰但尋屬忝皇枝
位叨列辟一以罪終魂骸莫赦生均宗籍死同匹豎旅
寔委雜封樹不修今歲月逾邁愆流疊往踐境興懷感
事傷目陛下繼明升運咸與惟新大德方臨哀矜未及
夫藥布哭市義犯雷霆田叔鉗赭志於夷戮况在天倫

何獨無感伏願稽若前准降申丹志乞薄改褊附微表
窀穸則朽骨知榮窮泉識荷臨紙哽慟辭不自宣

前廢帝詔報

征北表如此省已慨然誕及妻女並可以庶人禮葬并
置守衛

建安王休仁

文帝第十二子歷司徒尚書
令揚州刺史為明帝所害

陳貴妃禮敬議

明帝泰始二年有司奏皇太子
所生陳貴妃禮秩既同儲宮未

詳宮臣及朝臣並有敬否妃主在內相見又
應何儀博士王慶緒議百僚內外禮敬貴妃

應與皇太子同其東朝臣隸理歸臣節太常丞虞愿等同慶緒建安王休仁議參詳休仁

議為允

詔可

禮云妾既不得體君班秩視子為序母以子貴經著明文內外致敬貴妃誠如慶緒議天子姬嬪不容通音介於外雖義可致虔不應有牋表

皇太子車服議

泰始四年尚書令建安王休仁叅議詔可

天子之子與士齒讓達于辟雍無生而貴者也既命而尊禮同上公周制五等車服相涉公降王者一等而已

王以金輅賜同姓諸侯象及革木以賜異姓侯伯在朝卿士亦準斯禮按如此制則東宮應乘金輅自晉元過江禮儀疏舛王公以下車服卑雜唯有東宮禮秩崇異上次辰極下絕侯王而皇太子乘石山安車義不見經事無所出禮所謂金玉輅者正以金玉飾輅諸末耳左右前後同以漆畫秦改周輅制為金根通以金薄周匝四面漢魏二晉因循莫改逮于大明始脩五輅金玉二制並類金根造次瞻覩殆無差別若錫之東儲於禮嫌

重非所以崇峻陞級表示等威且春秋之義降下以兩
臣子之義宜從謙約謂東宮車服宜降天子二等駟駕
四馬乘象輅降龍碧旂九葉進不斥尊退不逼下沿古
酌時於禮為衷

巴陵王休若

文帝第十九子歷江
州刺史為明帝所害

移東土檄

孔顗前廢帝時為尋陽王子房右軍
長史行會稽郡事及太宗即位召為

太子詹事顗以時都下聲竭遠近叛離起事
必克遂擁子房發兵吳郡吳興晉陵一時響
應上遣休若董統東討諸軍
移檄東土顗等兵敗被殺

蓋聞鸞集有兆禍至無門倚伏之來實惟人致故囂述
貪亂終殄宗祀昌憲構氛旋潤斧鉞斯則昭彰記牒炯
戒今古者也自國步時艱三綱道盡神歇靈繹璿業綴
旒皇上仁雄集瑞英叡應厯鳳儀燁昇龍輝電舉盪穢
紫樞不俟鳴條之誓凝政中寓不肆漂杵之威是以隆
維再造虧天重構幽明裁紀標配斯光而羣凶恣虐協
扇童孺蕞爾東垂復淪醜迹邪回從慝蜂動蟻附聖圖
霆發神威四臨羽駟所屆義旅雲屬攬鉞所麾逆徒冰

泮勝負之效皎然已顯司徒建安王英猷冠世董率元
戎驃騎山陽王風畧夙昭撫厲中陳或振霜江蠡或騰
焱荆河金甲燭天庭囂聲震海浦前將軍吳興太守張
永東南標秀協贊戎機建威將軍沈懷明鎮東中兵參
軍劉亮武衛將軍壽寂之霜銳五千熊騰虎步龍驤將
軍王穆之龍驤將軍頓生鉄騎連羣風驅電邁右軍將
軍齊王射聲校尉姚道和樓艦千艘覆川盖記左軍垣
恭祖步兵校尉杜右文兗從僕射全景文員外散騎侍

郎孫超之並率虎旅駱驛雲赴殿中將軍杜敬真殿中
將軍陸攸之建武將軍吳喜甲楯一萬分趣義興予猥
承人乏總司戎統聳劒東馳申憤海曲歎氣則白日盡
晦刷馬則清江倒流以此伐叛何勅不勦以此柔服何
順不懷愍彼羣迷弗辨堯桀螳黽微命擬雷霆之衝已
枯之葉當霜颺之隊尺豎所為寒心匹婦所為歎息夫
因禍提慶資敗為成前監不忘後事明筮若能相率歸
順投兵効款則福鍾當年社覃來裔孰知身輟宗屠鬼

餒魂泣者哉詳鏡安危自求多福

晉平王休祐

文帝第十三子歷驃騎將軍南徐州刺史明帝拉殺之

與殷琰書

琰陳郡長平人歷少府加給事中

晉安王子勛反以琰督豫司二州豫州刺史琰家累在京邑義欲奉順前右軍叅軍杜叔寶等並勸琰同逆琰素無部曲門義不過數人無以自立受制于叔寶等太宗知琰事不獲已猶欲羈縻之以琰兄前中書郎瑗為司徒右長史子邈為山陽王休祐驃騎叅軍太宗遣輔國將軍劉勛等西討休祐出鎮歷陽為諸軍總統勛進軍小岘時休祐與琰書上又遣王道隆齎詔宥琰罪勛又與琰書并以琰兄瑗子邈書與之琰本無反心事由力屈

前後屢遣送誠牋而衆心持疑莫能相
一故歸順之計每多憊塞嬰城愈固

君本文弱素無武幹是遠近所悉且名器清顯不應復
有分外希覲近者之事當是劫于凶豎不能守節今大
軍長驅已造城下勢孤援絕禍敗交至顧昔情款猶有
惻然聖上垂天地之仁開不世之澤好生惡殺遐邇所
聞顧琛王曇生等皆軍敗迸走披草乞活尚蒙恩恕晏
處私門今神鋒所臨前無橫陳况窮城弱衆殘傷之餘
而欲自固乎若開門歸順自可不失富貴將佐小大竝

保榮爵何故苟困士民自求壘膾身膏斧鑊妻息并盡
老兄垂白東市受刑耶幸自思之信言不爽有如皎日

宋書

劉勔與殷琰書

類附

昔景和凶悖行絕人倫昏虐險穢諫諍杜塞遂殘毀陵
廟芟刈百僚縱毒窮凶靡有紀極于時人神回遑莫能
自保中內士庶咸願一匡予職在直衛目所備覩主上
神機天發指麾克定橫流塗炭一朝太平扶危拯急實

冠終古而四方持疑成此乖逆資斧所臨每從偃簡足
下以衣冠華胄信繫夙昭附戾從違猶見容養賢兄長
史階升清列賢子叅軍亦塞國網間者進軍宛唐計由
劉順退衆閉城當時未了過蒙朝恩謬充將帥蚤承風
素情有依然今皇威遠申三方蹙弱勝敗之勢皎然可
覽王御史昨至主上敕驃騎教賢兄賢子書今悲遣送
百代以來未有弘恩曲宥乃至於此且朝廷方宣示大
義惟新王道何容標虛辭於士女失國信于一州以足

下明識淵見想必不俟終日如其孤背亭毒弗忌屠陷
者便當窮兵肆武究法極刑將恐貴門無復祭祀之主
墳壘無埽灑之望進謝忠臣退慙孝子名實兩喪沒有
餘責扶力畧白幸加研覽

初琰長史龐道隆司馬劉順
皆勸琰同子勛及子勛進兵

順與柳倫皇甫道烈龐天生等
東據宛唐與勛相持守四月

劉勛又與殷琰書

子勛以龐孟蚪為司州刺史率精兵五千救
義陽并解壽陽之圍勛遣呂安國進軍破孟
蚪于蓼潭義軍主陳朧又破之于汝水孟蚪
走向義陽義陽已為王玄謨子曇善起義所

據乃逃于蠻中八月皇甫道烈柳倫等二十一人聞孟蚪敗並開門出降勛因又與琰書琰將降先送休祐內人出城然後開門時琰有疾以板輿與諸將帥面縛請罪勛並撫宥無所殺戮

柳倫來奔具相申述方承足下迹纏穢亂心秉忠誠惘然窮愁不親戎政去冬開天之始愚迷者多如足下流比進非社稷宗臣退無顧命寄託朝廷既不偏相嫌責足下亦復無所獨愧程天祚已舉城歸順龐孟蚪又繼迹奔亡劉胡困於錢溪袁顥欲戰不得推理揆勢亦安

能久且南方初起連州十六擁徒百萬仲春以來無戰
不北摧陷殄滅十無一二南憑袁顓弱卒北恃足下孤
城以茲定業恐萬無一理方今國網踈畧示舉宏維比
日相白想亦已具矣且倫等皆是足下腹心牙爪所以
攜手相捨非有怨恨也了知事不可濟禍害已及故耳
夫擁數千烏合抗天下之兵傾覆之狀豈不易曉假令
六蔽之人猶當不為其事况復足下少祖名教疾殄世
無稱者耶所以復有此白者實惜華州重鎮鞠為茂草

兼傷貴門一日屠滅足下若能封府庫開四門宣語文武示以禍福先遣咫尺之書表達誠款然後素車白馬來詣轅門若令足下髮膚不全兒姪彫耗者皇天后土

實聞此言至辭不華寧復多白

並宋書 子勛即偽位於尋陽遣豫州刺史劉

胡率衆來屯鵲尾又遣安北將軍袁顥總統衆軍臺軍屯據前谿斷顥等糧援胡遣將攻之大敗焚營遁走顥奔亦南

桂陽王休範

文帝第十八子

與袁粲褚淵劉秉書

粲淵見後 秉字彥節宋宗室歷尚書令與粲同害

休範謹澀無才能為驃騎大將軍江州刺史
及太宗晏駕主幼時艱休範自謂宗戚莫二
應居宰輔事既不至怨憤彌結朝廷知其有
異志密相防禦議以休範居尋陽上流以皇
弟晉熙王爽為郢州刺史配以資力出鎮夏
口慮為休範所撥留自太湫去不過尋陽休
範大怒遂舉兵反發自尋陽與袁粲等書至
新林朝廷震動蕭道成次新亭屯騎校尉黃
回偽降宣道成意旨回與越騎
校尉張敬兒直前斬休範首

夫治政任賢宜親疎相輔得其經緯則結繩可及失其
規矩則危亡可期漢承戰國之餘傷周室衰殄立磐石
之宗而致七國之亂魏草漢典創於前失遂使諸王絕

朝聘之禮是以根疎葉枯政移異族今宗室衰微自昔
未有泰寧之世足以為譬孤子忝枝皇族預關興毀雖
欲忘言其可得乎高祖武皇帝升叡三光滌紛四表太
祖文皇帝欽明冠古資乾承厯東鉞西服鳴鑾東京搜
賢遂能納奇賞異孝武皇帝岐嶷天縱先機雷發陵波
靜亂宏業中興儲嗣不腆遂貽禍難于時建安王以家
難頻遭宜立長主明皇帝恢朗淵懿仁潤含遠奉戴南
面允合天人而太尉以年長居卑怨心形色柳欣慰等

規行不軌事跡披猖驃騎以忤顏失旨應對不順在蕃
刻削怨結人鬼先帝明於號令豈枉法為親二王之釁
實自由已但司徒巴陵王勞謙為國中流事難有不世
之勲奉時如天事兄猶父非惟令友信為國器唐叔之
忠而受管蔡之罪親戚哀憤行路嗟嘆王地藉光潔德
厭民望並無寸罪受斃讒邪先帝穆于友于留心親戚
去昔事平之後面受詔誨禮則君臣樂則兄弟升級賜
賞動不移年撫慰孜孜恒如不足豈容一旦閱牆致此

禍害良有由也先帝寢疾彌年體疲膳少雖神照無虧而慮有失德補闕拾遺責在左右于時出入卧內唯有運長道隆羣細無狀因疾造禍見上不和知無瘳拯慮晏駕之日長王作輔奪其寵柄不得自專是以內假帝旨外託朝議諛辭詭貌萬類千端升進姦回屠斥賢哲外矯天則內誣人鬼是以星紀違常義望失度昔魏顆擇命春秋美之秦穆殉良詩有明刺臣子之節得失必書不及匡諫猶以為罪交間蒼蠅驅扇禍戮爵以貨重

才由貧輕先帝舊人無罪黜落薦致鄉親徧布朝省諂
諛親狎者飛榮玉除靜立貞粹者柴門生草事先闕已
雖非必行若不諮詢雖是必抑海內遠近人誰不知未
解執事不加斧鉞遂致先帝有殺弟之名醜聲遺于君
父格以古義豈得為忠先帝崩殂若無天地理痛常情
便應赴泣但兄弟枉酷已陷讒細孤子已下復觸姦機
是以望陵墳而摧裂想鑾旂而抽慟雖復才微寄寵而
地屬負荷顧命之辰曾不見及分崩之際詔出兩豎天

誘其衷得居乎外若受制羣邪則玉石同碎矣以宇宙之基一旦受制卑瑣劉氏家國使小人處分終古以來未有斯酷昔石顯曹節方今為優而望之仲舉由以致弊至於遭逢醜惡豈有古今者乎諸賢冑籍冠冕世厯忠貞位非恩樹勲豈寵結憂國勤王社稷之鎮豈可舍縱讒凶坐觀傾覆自惟宋室未殞得以推移者正內賴諸賢防勒姦軌外有孤子跨據中流而人非金石何能支久走一虧落則本根莫庇當今主上冲幼宜明典章

征虜之鎮不見慰省逆旅往來尚有顧眄骨肉何讎逼
使離隔禽獸之心橫生疑貳經由此者每加約截同惡
相求有若市賈以孤子知其情狀恒恐以此乘之鉗勒
州郡過見防禦近遣西南二使統內宣傳不容恐懼即
遣啓并有別書若以孤子有過便應鳴鼓見伐如其不
爾宜令各有所歸與殺不辜憲有常辟三公之使無罪
而斬鄙雖不肖天子之季父卑小主者敢不如是乎孤
子承奉今上如事先朝夙宵恭敬散心雲日晦望表驛

相從江衡有何虧違頓至於此既已甘心其可再乎如
往來所說以孤子納士為尤此輩懼其身罪豈為國計
在昔四豪列國公子猶博引廣納門客三千况孤子位
居鼎司捍衛畿甸且今與昔異咸所知也魏人陵掠江
淮侵逼主上年稱宗室衰微邪僭用命親賢結舌疆場
嬰塗炭之苦征夫有勤役之勞瓜時不代齊猶致禍况
長淮戍卒歷年怨思不務拓遠強邊而先事國君親戚
以此求心何事非亂又以繕治盆壘復致鼙聲自晉宋

之灾積貯百萬孤子到鎮曾不數千里且修城池整郭
邑為治常理復何足致嫌耶若以中流清蕩則任農夫
不應實力彊兵作鎮姑熟俱妨寇害豈得獨嫌於此昔
成王之明而為流言致惑若使金縢不聞則周公無以
自保樂毅歸趙不忍謀燕况孤子禮則君臣恩猶父子
者乎所以枕戈泣血祇以兄弟之讎爾觀其不逞之意
豈可限量設使遂其虐志諸君欲安坐得乎唇亡齒寒
理不難見桂蠹必除人邪必翦枉突徙薪何勞多力望

便執錄二豎以謝寃魂則先帝不失順悌之名宋世無
枉筆之史此州地居形要路枕九江控弦跨馬越關而
至重氣輕死排藪競出練甲照水總戈成林剝此纖隸
何患不克但千鈞之弩不為鼯鼠發機欲使薰蕕內辨
晉陽外息爾功有所歸不亦可乎便當投命有司謝罪
天闕同奉溫清齊心庶事伊霍之任非君而誰周召之
職頗以自許左提右挈無媿古人昔平勃剛斷產祿蚤
誅張溫趙趙文臺扼腕事之樞機得失俄頃往車今轍

庶無惑焉近持此意申之沈攸其憤難不解諸王致此
既知禍原銳然奮發蓄兵厲卒以俟同舉張興世發都
日受制凶黨揚颿直逝遂不見遇孤子近遣信申述姦
禍方大惆惋追恨前迷比者信使每申勤款王奐佐郢
兵權在握厥督屠狂朝野嗟痛猶父之怨寧可與之比
肩孤子此舉增其忼慨義之所勸其應猶響諸君或未
得此意故先告懷徙倚一隅遲及委問孤子哀疾殫毀
窮盡無日庶規史鮪死不忘本臨紙荒哽言不詮第

宋書

任農夫臨淮人朝廷慮休範東下以

農夫為輔師將軍淮南太守戍姑孰

江淹敕為朝賢答休範書

昔媯道鼎昌干羽未能戢姬德昭宣長旌猶卷舒焚衣

毀冕有自來矣皇宋靈武誕命缺道鬱終三后連光四

聖沓軌或經天緯地構紫靈之符調風偃海隆黃旗之

祚莫不頌滿金石聲彰宇宙者也暨我太宗明皇帝惟

岳降聖重耀函夏延禮璧臺訪道衡室平陽之后卷迹

慙靈空同之君斂功謝德是以綵雲祥風之瑞布護區

中梯山踐火之俗款徼請吏跨商軼夏洗周滌漢道德
優衍猶不封禪遐靈在天餘惠無泯主上文明金相穆
然玉色履璧之禎獲珪之應著在紀歲仁浸汙河惠愛
秋草想亦君之所聞也重以先帝靈畧潛通英轡遠馭
受話言必忠貞方肅之臣奉風聲必虔恭匪懈之士明
時琴瑟鼎鉉之盛且被於寧世而忽覲來書以悅以慨
君為齊梁楚越之士鼎貴一時金玉滿堂文馬千駟爵
授湯沐冠蓋於道惟名尊崇誰與為雄而出言效尤吐

音入戾舉旗類社志竊神禁稱兵斂衆遂窺外關今朝
無闕政頓構凌上之節室無嬖豎坐生莫大之釁鴟梟
赭衣號稱徒黨主萃淵藪寧滋之甚不臧不軌不忠不
義未有若斯者也宗枝之釁遠則吳楚見禽於一壁磐
石之孽近則江荆面縛於小將此成敗蘭艾之鑒又亦
君之所知也聞彼虹飲鼠舞之異早見物徵河北隴右
之謠已露童詠所謂妖由人作孽不可逃然桓侯之患
良助寒心今羽林黃頭駱驛爭引熊渠飲飛首尾電發

伏波樓船掩江蔽汜渡遼甲卒充野布隰加以先天蓋
世之略蕩海拔山之威任輔沛陳羽林鷁鵠露動龍驤
精騎風驅然後六師雲起九軍星連蜺旌外江虹艦中
水金甲映平陸鐵馬焰長原蹴南嶽而永慨瞰九派而
懷恐伐罪弔民復驗于茲甫刑三千惟此為大僕才等
不羈志滙丹款故奏禍福行矣悵然袞褚劉蕭等疏

袞

褚淵劉秉蕭道成

明時上有脫句任輔
沛以下至風驅以下缺誤

江文通集

西陽王子尚

字孝師孝武帝第二子初封西
陽王改封豫章為明帝所害

山湖禁科奏

子尚大明初為揚州刺史上言有司檢壬辰詔書占山護澤彊盜律

論賦一丈以上皆棄市尚書左丞羊希以其禁嚴刻立制五條從之

山湖之禁雖有舊科民俗相因替而不奉嵐山封水保為家利自頃以來頽弛日甚富彊者兼嶺而占貧弱者薪蘓無託至漁採之地亦又如茲斯寔害治之深蔽為政所宜去絕損益舊條更申恒制

民杜氏通典作人

尚書左丞羊希議

希玄保兄子為廣州刺史見害

壬辰之制其禁嚴刻事既難遵理與時弛而占山封水

漸染復滋更相因仍便成先業一朝頓去易致嗟怨今更刊革立制五條凡是山澤先常爨爨種養竹木雜果為林及陂湖江海漁梁鰮鱉場常加功修作者聽不追奪官品第一第二聽占山三頃第三第四品二頃五十畝第五第六品二頃第七第八品一頃五十畝第九品及百姓一頃皆依定格條上貲薄若先已占山不得更占先占闕少依限占足若非前條舊業一不得禁有犯者水土一尺以上竝計贓依常盜律論停除咸康二年

壬辰之科

嗟怨通典作怨嗟先常作先恒養竹木雜果為林作種竹木薪果為林常加作恒加

晉安王子勛

字孝德孝武帝第三子歷江州刺史明帝初舉兵敗誅

傳京邑檄

子勛出鎮江州鄧琬為鎮軍長史尋陽內史行江州事前廢帝狂悖遣使

齋藥將賜子勛死琬與錄事參軍陶亮等決計舉兵使記室參軍荀道林為檄文會太宗

弒廢帝自立進子勛車騎將軍開府儀同三司琬等拒命進道傳檄京師奉子勛即位尋

陽兵敗並見殺子勛起兵參軍事顧昭之沈伯玉荀道林等參管書記初檄出道林此

未詳孰撰

陽六數艱雲雷相襲高皇受厯時乘雲轡頓于促路文

祖定祥係昭睿化翦於中年二凶縱禍三綱理滅宗王
俛首姑息逆朝枕戈無聞偷榮有秩孝武皇帝釋位泣
血糾義入討投袂戎首親戮鯨鯢九服還輝兩儀更造
而窮旻不惠棄離萬國皇運重替嗣王荒淫孤以不才
任居藩長大懼宗稷殲覆待日故招徒楚郢飛檄京甸
志遵前典黜幽陟明庶七廟復安海昏有紹豈圖宋未
悔禍弑亂奄臻遂矯害明茂纂竊天寶反道效尤茂我
皇德干我昭穆寡我兄弟恣鴟鴞之心蹈倫穎之志覆

移鼎祚誣罔天人藐孤同氣猶有十三聖靈何辜而當
乏響昔隆周弛御晉鄭是依盛漢中陵居章抗節支苗
輕屬猶或忘軀况孤忝惟人子情地兼切號感一隅心
與事痛是用飲血衽金誓復宗祀今遣輔國將軍諮議
領中直兵孫冲之龍驤將軍陳紹宗率螭虎之士組甲
二萬泚流電發逕取白下龍驤將軍領中直兵薛常寶
建威將軍領中直兵沈懷寶長戟萬刃羽騎千羣逕出
南州直造朱雀寧朔將軍諮議領中直兵陶亮龍驤將

軍焦度摠中黃之旅梟雄三萬風捲江介雲臨石頭建
威將軍張列龍驤將軍何休明提育獲之徒勁悍之卒
邪趨金陵北指閭闔龍驤將軍張係伯龍驤將軍陳慶
勒輕銳五千強弩一萬飛鋒班瀆齊會西明冠軍將軍
尋陽內史鄧琬提湘雍之兵勇敢四萬授律摠戎飈集
京邑征虜將軍領府司馬張悅蒼兕千艘水軍五萬大
董羣校絡繹繼道冠軍將軍豫章內史劉衍寧朔將軍
武昌太守劉弼寧朔將軍西陽太守謝雅建威將軍領

中直軍晉熙太守閻湛之皆掃境勝兵薦誠請効後將
軍郢州刺史安陸王子綏懷德纏慕鞠旅先晨冠軍將
軍湘州刺史邵陵王子元席颿凌波整衆邁至前將軍
荊州刺史臨海王子頊練甲陝西獻徒萬數輔國將軍
冠軍長史長沙內史何惠文見拔先皇誠深投袂冠軍
將軍雍州刺史袁顥不謀同契雷發漢南建武將軍順
陽太守劉道憲懷忠抱慨不遠三千梁益青徐兗豫吳
會皆密介歸誠誓為表裏孤親摠丞徒十有餘萬白羽

咽川霜鋒照野金聲振谷鳴輦聒天凡諸將帥皆忠無
匿情智無遺計果幹剛鷲譎略多奇水陸長驅數道並
進發舟踰險背水爭先以此衆戰孰能斯禦推此義銳
滄海可陲諸君或荷寵前朝感恩舊日或奕世貞淳見
危授命而逼迫寇手效節莫由今大軍密邇形援已接
見幾而作豈俟終日便宜轉禍趨福因變立功夫旦爽
與三監並時金霍與上官共主邪正粗雜何世無之但
績亮則名播姦駟則道消耳紀季入齊陳平歸漢身尊

譽遠明誓是哀成乾全規殷鑒匪遠若玩咎惟休告舍
罔悟則誅及五族有殄無遺軍科爵賞有如皦日巫山
既燎芝艾共烟幸遵良塗無守毀轍檄到宣告咸使聞
知

尚書討晉安王子勛符

夫晦明遞運崇替相沿帝宋之基懋業維永聖祖重光
氤氲上業狂昏承祀國維以紊毒流九縣釁穢三靈縉
紳戮辱黔庶塗炭人神同憤朝野泣血聖上明睿在躬

膺符握曜眷懷家國夙夜劬勞懼社稷湮蕪彝倫左衽天
威雷發氛沴冰消殄凶譙門不俟鳴條之旅殲虐牧野無
勞孟津之鉞華夷即晏晷緯還光鏗鏘聞于管絃趨翔
被于冠冕同軌仰化異域懷風劉子勛昏世稱兵義同
翦惡明朝不戢同讖邪正窺窬畿甸逼遏兩江陵上無
君暴於遐邇王赫斯怒興言討違命被上將治兵薄伐
今遣寧朔將軍尋陽內史沈攸之輕銳七千飛舟先邁
龍驤將軍劉靈遺羽林虎旅連鋒繼造假節督南討前

鋒諸軍事冠軍將軍兗州刺史殷孝祖驅濟河勁卒電
擊雷動使持節車騎將軍江州刺史曲江縣開國侯王
玄謨烝徒五萬董統前師使持節侍中司徒揚州刺史
建安王休仁擁神州之衆摠督羣帥龍驤將軍劉劭寧
朔將軍劉懷珍步騎五千直指大雷寧朔將軍柳倫司
州刺史龐孟虬淮潁突騎邪趨西陽使持節驃騎大將
軍豫州刺史山陽王休祐摠勒步師連騎百萬河舟代
馬遙驚江濱越棘吳鉤交曜畿服笳鼓動坤維金甲震

雲漢犄角相望水陸俱發冠軍將軍武念率雍司之銳
已據樊沔徐州刺史申令孫提彭宋剽勇陵塗歟奮皇
上當親馭六師降臨江服旌旆掩雲舳艫咽海昔吳楚
連衡燕淮勁悍塵擾區內聲沸秦中霧散埃滅豈非先
鑒而嬰彼孤城以待該天之網迫此烏合以抗絡寓之
師雲羅四掩霜鋒交集猶勁颭之拂細草烈火之掃寒
原焦卷之形昭然已著朝廷惻愍我僚吏哀矜我士民
並亦何辜拘誤迷黨故加宣示令得自新如其淪惑不

改抵冒王威同焚既至雖悔奚補奉詔以四王幼弱不幸罹難兵交之日不得妄加侵犯若有逼損誅翦無貸左右主帥嚴相衛奉註誤之罪一無所問

尋陽王子房

字孝良孝武帝第六子厯會稽太守敗為松滋侯尋殺之

與吳喜書

太宗初四方反叛尋陽王子房舉兵以應晉安王庾業劉延孫等並從時喜為殿中御史請得精兵三百致死於東太宗即假建武將軍簡羽林勇士配之喜既至永世得庾業劉延熙書送子房檄又與喜書喜答之東兵敗延孫投水死業被殺

知統戎旅已次近路卿所在著名今日何為立忠於彼
邪想便倒戈共受河山之賞

吳喜報庾業劉延熙書

喜吳興臨安人歷淮陵太守假冠軍將軍賜死

業新野人為右軍司馬義興太守
延熙延孫弟臨海義興太守

前驅之人忽獲來翰披尋狂惑良深悵駭聖主以神武
撥亂德盛勲高羣逆交扇滅在晷刻君等勲義之烈世
荷國恩事愧鳴鵠不懷食堪今練勒所部星言進邁相
見在近不復多陳

並宋書 按前書乃尋陽王子房與
喜此則喜報業等永世所得書也尺

牘作答尋

陽王誤

臨川長公主

諱英媛文
帝第六女

請還王氏表

東陽太守王藻尚主主以妬讒藻
于廢帝下獄死與王氏離婚太宗

頗疾諸主多妬
主上表許之

妾遭隨奇薄絕於王氏私庭罵戾致此分異今孤疾瘵
然假息朝夕情寄所鍾唯在一子契濶塗炭特兼憐愍
否泰榮枯繫以為命寔願申其門釁還為母子推遷僮
俛未及自聞先朝慈愛鑑妾丹衷若賜使息徹歸第定

省仰揆天旨或有可尋今事迫誠切不顧典憲敢緣恩
燾觸冒披聞特乞還身王族守養弱嗣雖死之日實甘
於生

彭城王義康女玉秀等


乞還父喪奏

義康坐范曄等謀立徙付安成都
元嘉二十八年賜死葬安成大明

四年玉秀等露版辭
乞詔聽并加資給

父凶滅無狀孤負天明存荷優養沒蒙加禮明罰羽山
未足救法烏鳥微心昧死上訴乞反葬舊塋康骨鄉壤

並宋書



宋文紀卷六